

萬 有 文 庫

第 二 集 七 百 種

王 雲 五 主 編

楹 聯 叢 話

附 續 話

(下)

梁 章 鉅 輯

商 務 印 書 館 發 行



話叢聯楹

話續附

(下)

輯鉅章梁

書叢本基學國

王雲五主編
萬有文庫

第二集七百種

楹聯叢話
附續三冊

中華民國二十四年三月初版

編輯者 梁章鉅

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

翁

楹聯續話

卷三

佳話

臨海王芝圃廣文世芳。生於順治己亥年。一百十歲。時人都慶祝。賜侍講銜。都人呼爲王壽星。扶侍者爲其第三子。白髮飄蕭。背轉偃僂。問其長子。曰不幸夭亡矣。問夭亡之年。曰八十五歲。當年屆七旬時。孫曾已盛。百齡外。孫曾復舉。曾孫壽星大喜。自題楹聯云。身歷四朝沾浩蕩。眼看七代衍孫曾。

槐廳載筆云。崑山徐太翁。當明末。土寇竊發。擄婦女數十人。藏於徐氏。賊將他出。屬太翁善守之。歸若少一。當取汝命。賊甫去。太翁卽各詢其夫家母家。親送還之。婦女皆叩頭流血去。太翁亦自焚其屋而逃矣。國初定鼎後。土寇削平。太翁三子。長乾學。次秉義。三元文。皆鼎甲八座。其門對一聯云。侍郎尙書都察院。狀元榜眼探花郎。皆太翁陰德之報云。

沈椒園廷芳贈董文恭公聯云。著書臺迥名繁露。入畫山多學富春。一切姓。一切地。又切其善畫也。李雨村調元制義科瑣記云。章孟端爲御史。多所彈劾。中貴忌之。罷歸。諸子連中進士。爲京官。同處一邸。

書聯於壁云。四壁金花春宴罷。滿床牙笏早朝歸。人多羨之。

桐城張文端公。父子端揆。文和公自撰堂聯云。兩世三公。太平宰相。一堂五代。富貴神仙。或謂十六字中。惟神仙二字落空。不知公家詞臣接武神仙之福。較富貴之稱。尤爲可艷耳。

王楷堂比部廷紹。北直人。屢與春秋闈。分校所得。多南省佳士。陳蓮史三元。卽出其門。林少穆督部。贈以聯云。南士淵源承北學。秋曹門館坐春風。又張雲巢鹽政青選。罷官後。就杭州買宅而居。適得其喆嗣。館選之信。少穆贈以聯云。清門甲第傳兒輩。舊部湖山屬寓公。蓋雲巢曾久令於浙中也。

歙縣曹文正公。贈吳崧圃參知聯云。白髮盈簪。凡內外將相公卿。咸識三朝元老。黃河如帶。徧東南兒童父老。共欽六筮宣防。公會三任東河。三任南河。本朝河臣中所未有也。龔季思尙書守正。亦有聯云。節制兩河。德水廿年瞻福曜。耆英七袞。恩綸初吉賁中樞。蓋公官大司馬時。曾於二月初一日蒙賜壽云。

嘉慶乙亥二月三日。上命王蓮府少宗伯宗誠。爲其父文僖公懿修。豫稱八旬之觴。黃左田尙書鈺。贈聯云。謝恩孫代趨朝杖。上壽兒歸聽講筵。蓋是日上御經筵。蓮府時以禮部侍郎。職司典禮。而文僖公至景運門謝恩日。上先諭令孫扶掖也。

戴羨門督部三錫七十賜壽。花曉亭時爲蜀臬。獻聯云。帝壽股肱。九霄賜額。民歌父母。八座齊眉。

陳望坡尙書七十賜壽。京邸知交。祝聯甚多。惟曹文正公振鐺一聯云。帝命汝作士。惟明克允。天錫公純。

遐。俾壽而康。最爲人所稱。又鄭仁圃太守一聯云。望重達尊。北斗尚書南極老。恩承敬典。天朝耆舊地行仙。

陶雲汀督部駐節金陵。六十賜壽。齊梅麓獻聯云。八州都督。五柳先生。經濟文章。百代心傳家學遠。六甲初周。一陽來復。富貴壽考。兩朝身受國恩長。蓋稱觴之辰。值黃鍾之月也。

諸城劉文清公之太夫人九十壽辰。阮芸臺師所製壽聯。膾炙人口。已載前編。近晤黃右原。知吳山尊學士曾爲朱文正師。代製一聯云。夫作宰相。子作宰相。佇見文孫成宰相。古今一品太夫人。能有幾個。天許長生。帝許長生。更聞多士祝長生。富貴百年曰壽考。請增十齡。與芸臺師句意相仿。似流麗有餘。而莊雅稍遜也。

鮑覺生侍郎桂星。爲富陽董文恭公七十壽聯云。聽履承家。秉鈞杖國。卷阿頌爽。嵩嶽生申。莊嚴典麗。蓋非文恭不足以當之。

浙江德清徐氏。六世翰林。曹地山宗伯秀先。有贈徐西灣楹聯云。前生慧業摩麟角。六世清聲冠鳳池。吳玉松太守雲。早歲辭官。逍遙里社。所受業女弟子。多至數十人。年八十。其子藹人學士。已乞養在家。顧南雅通政純。寄聯壽之云。泉石衍箕裘。名心早淨雲封岫。翠鈿圍杖履。笑口常開雪避髭。

錢梅溪履園叢話云。莊本培學士培因。少時自負才華。不作第二人想。乾隆己丑。其兄方耕少宗伯存與。

榜眼及第時。學士猶未捷南宮。作詩調之云。他年小宋魁天下。始信人間有弟兄。後果中甲戌狀元。潘芝軒尙書未第時。與其兄樹庭中翰。咸爲名諸生。其封翁雲浦先生。索余楹帖云。老蘇文學能傳子。小宋才名不讓兄。後芝軒中乾隆癸丑狀元。樹庭頗惡此聯。爲易去之。亦詩兆也。

桂林陳蓮史方伯繼昌。爲文恭公元孫。登嘉慶庚辰科三元。時繼蓮龜方伯繼昌。適維藩粵西。手贈楹帖云。高祖當朝一品文孫。及第三元。雖渾成終覺太質。而鮮味。後蓮史歷官中外。洊至直隸藩伯。潘芝軒閣老贈聯云。畿輔爲屏。越五百里。科名蓋代。第十三人。則傳誦於人口。按歷代至今。登三元者。唐有張又新。崔元翰。宋有王曾。宋庠。馮京。王巖叟。孫何。楊寘。金有孟宗獻。元有王宗哲。明有商輅。我朝則已有錢棨。陳繼昌兩人。趙甌北賀錢湘舲三元詩云。累朝如君十一个。是繼以錢陳共十三人也。然其閒如張又新。在當時實稱爲張三頭。謂進士狀頭。宏詞敕頭。京兆解頭。見崔元翰爲京兆解頭。禮部狀頭。宏詞敕頭。制科三等敕頭。則是四元。見王巖叟以明經科。鄉舉省試。廷對皆第一。則是明經。非進士科。見宋史。金史。楊伯仁傳。謂孟宗獻發解第一。伯仁讀其程文。謂當成大名。是歲宗獻府試。省試。廷試皆第一。則當時稱爲孟四元。蓋金時尙多一府試耳。又見歸潛志及中州集。是三元故事。又各微有不同也。又按雞窗剩言。記黃觀。洪武甲子。南京解元。辛未會試第一。廷對禦戎策。太祖擢置狀元。後殉建文之難。亦見傅維麟明書忠節傳。似洪武中已有一三元。不獨商文毅一人。然明史黃觀傳。但云以貢入太學。洪武二十四年。會試。廷試皆

第一而選舉志亦謂三試第一者明代惟商輅一人則黃觀之三元似又未確實故趙甌北止云十一人程春海贈朱蘭坡聯云東壁仰儒風正色卻邪蒿之簍南天培士氣高文扶大雅之輪蓋蘭坡曾侍學三天又方爲吳中掌教也

洛陽令鄒堯廷之太夫人九十壽辰秦荅溪太守伯度屬陳東橋孝廉應元代撰一壽聯云愛日佇期頤蘭階早釀十年酒慈雲周海嶽萊綵猶栽一縣花蓋令之尊人石泉太守貽詩曾官閩中三十年至今去思未艾當時太夫人皆隨任也

吳中有令長之母以三月三日六十壽者嚴問樵製聯云衆母奉壽母江南大母三春祝千春上巳長春孟瓶菴師德配何太恭人七十壽辰余伯兄虛白公際昌獻聯云人間賢母曾推孟天上仙姑本姓何恭人素通詩禮得之甚喜

程梓庭總督閩浙時其封翁九十壽辰程春海侍郎以聯寄祝云六秩翁侍九重親况伉儷偕老子孫賢問內外貴僚誰同大福七閩歌兼兩浙舞合竟豫去思吳楚頌願東南吉曜直麗中台蓋梓庭曾旬宣山左巡撫中州楚南吳下封翁皆就養云

道光辛卯江南大水文闈改期九月時梓庭中丞爲監臨中丞本徽產卽前此戊午年魁江南榜者因於首場題一聯於至公堂柱云矮屋策高文九天升九淵沈九轉丹凝多士出身在此九月九日秋闈醒春

夢三藝競三場竟三條燭燼一官回首於今三十三年。

周石芳侍郎系英。視學江南。自榜一聯於堂上云。縣考難。府考難。院考尤難。四十八年纔入泮。鄉試易。會試易。殿試更易。二十五日已登瀛。蓋自道其名。場甘苦之味。然吾鄉陳望波尙書。以七月入泮。九月登鄉薦。次年四月成進士。得館選。前後不過十閱月登瀛。尤爲得意也。

程定甫同年贊清。於道光乙未。重游泮宮。時龔季思爲江蘇學政。贈以聯云。二分月下眞耆宿。六十年前舊茂才。是年余適過揚州。定甫招飲。遂卽席書一聯贈之云。想當年發跡雞窗有餘味。是他日重歌鹿野之先聲。此皆羌無故實也。定甫得之甚喜。

鎮江有某齏商。欲求阮芸臺師書楹帖。師未許也。而某商愈欲得之。師令人語之曰。我有兩部舊書。應歸鎮江人刊行。如肯成此美事。必書楹帖以報之。某商首肯。師卽日以七字聯句獎之云。古籍待刊三十載。舊聞新見一千年。跋云。嘉慶間。余得宋嘉定。元至順。鎮江府志兩部。皆四庫未收之書。曾經進呈。得蒙恩鑒。因以底本貯之焦山。書藏三十餘年。無過而問者。歲辛丑。丹徒包怡莊學兄。請付棗梨。鎮江之書。歸鎮江人珍護。甚善。不意歸田老眼。尙見此書之成。乃知書之行世。及刊書之人。遲早皆有福命焉。因喜而記之。節性齋老人阮元撰。並書。時年七十有八。聞此書近已刻成一部。其一部亦已開雕矣。

陳仲雲藩伯嘉樹。道光壬寅年正月初十日六十歲。膝下有八子。是年正月十三日立春。羅茗香祝以聯。

云。有才子八人。綵獻萊衣。林壬大備。先立春三日。釐延柑酒。花甲初周。巧思濬發。可謂獨出冠時矣。
葉小庚申。薊守洛陽。自署儀門聯云。郡望舊京畿。金谷豪奢函谷險。物華真秀麗。伊川山水洛川花。又客
坐聯云。芸館忝題名。三紀聲華留日下。莎庭閒坐嘯。六年宦績在天中。又一聯云。宦品宜適中。居職忝爲
二千石。壯齡方筮仕。服官瞬過三十年。

潘榕皋奕雋。以八十六歲。赴瓊林重宴。萬浣雲邑侯臺贈聯云。泮藻重游。萃筮重聽。瓊林重宴。老子壽星。
哲嗣德星。賢孫文星。語實而確。時其子理齋農部世璜。已請終養。廿年餘。理齋之子。新入泮宮云。

嚴問樵官山左時。寅好中聯對。多出其手。如石耀卿大令尊甫官山右司馬。七十壽聯云。西人慈母。東人
大父。北極湛露。南極壽星。又侯理庭太守之母夫人。九月初十日九十壽聯云。開上壽初筵。九十曰耄。後
重陽一日。八千爲秋。又理庭之公子新婚曹氏賀聯云。雀屏妙選。今公子鴻案清芬。占大家。又蔡仰齋州
判夫婦五十雙壽。其門下士以七夕稱祝聯云。屈指三秋。天上又逢七夕。齊眉百歲。人間自有雙星。
百文敏公百齡總制兩廣。平定海氛。有世襲輕車都尉之賞。其時公子尙未育也。蔣伯生獻聯云。天子知
從無事日。郎君貴在未生時。文敏逢人輒誦之。

王惕甫世孫將赴華亭教官之任。吳穀人先生以聯贈之云。儒以道得民。此官不賤。學而優則仕。如日之
升。又鄭六亭兼才自題學署云。天子命之教。人才繫此官。皆可爲司鐸。閒曹吐氣也。

相傳有學署舊聯云。漫道官閒。二十一史繁難頻判案。誰云署冷。三五六經。鼓吹自排衙。亦自新穎可喜。

挽詞

洪桐生掌教揚州之梅花書院。終於講席。時城內安定掌教吳穀人先生。輓以聯云。十載共皋比。舊夢荒涼梅嶺樹。諸兒蒙教澤。春風慚愧杏林花。蓋先生諸兒。皆肄業梅花書院。而西穀清鵬。正探花及第也。吳穀人先生。亦終於安定講席。吳山尊輓以聯云。仕隱追隨。顏景相憐如一日。師生骨肉。名山可許附千秋。劉金門侍郎。時寓居揚州。亦輓以聯云。正味在文章。凡識字人同一哭。清風論出處。擬私諡者定何辭。蓋先生詩文集。名有正味齋也。

畢秋帆先生總制兩湖時。值剿捕流寇未蕨功而薨。趙甌北挽以聯云。羊祜惠猶留峴首。馬援功未竟壺頭。此不但峴首壺頭。用典精切。而羊祜馬援。亦成佳對。且切合時事。開合俯仰。尤見情餘於文也。按此聯甌北亦自得意。後衍成挽詩。編入全集內矣。

浙中錢東生學士林。文筆敏贍。而古貌古心。毫無時俗態度。人皆知其能到陰司判事。而口絕不談。余嘗同扈從盤山者數日。行帳相接。每退直。必相晤語。微叩其端。皆笑而不答也。未及中壽而化去。戚荅臺太史入鏡。挽以聯云。福慧並清華。能靜自兼仙佛意。死生都了徹。不談終是聖賢心。足以傳學士矣。游彤卣侍御光輝。輓陳質齋侍郎云。對宇望衡。回首燕臺真似夢。素帷丹旆。傷心吳苑不成春。蓋游與陳。

在京邸久爲鄰。陳奔喪歸。沒於蘇州也。

魯鱗飛。應甲輓石曉田煦之兄云。老泪我無多。數落落晨星。從此驂騑空冀北。雄才君未盡。歎茫茫泉路。相隨鴻雁到荆南。時曉田官荊州郡丞也。

陶雲汀宮保丁父憂。其座主陸平泉尙書以莊寄輓以聯云。能仕教之忠。有子詩書將食報。欲養親不待。類余風樹早銜悲。

姚亮甫中丞輓章文簡公煦聯云。箕尾黯星躔。詔語天嗟遺老一。衣冠崇洛社。典型人失達尊三。又輓張蘭渚侍郎聯云。奏賦共螭坳。譜誼同敦。感西湖四十七年爪印。寫經飯鹿苑。禪心早定。付南屏一百八下鐘聲。出句謂乾隆甲辰同召試於西湖事。次句謂侍郎素耽禪悅。易簀時尙有南屏僧數十人環繞榻前。代宣佛號也。

有某公輓陳雪田聯云。志在名山。不作公卿緣好學。文能壽世。非求仙佛自長生。此蓋襲用袁簡齋先生句而稍變其意者也。

翰林張某者。新婚甫兩月而病沒。太夫人猶在堂也。其婦翁輓以聯云。逝矣修文郎。縱玉堂傳舍。金粟空花。回首能忘垂老母。傷哉薄命女。僅三日同牢。六旬嘗藥。斷腸永作未亡人。語極沈痛。

常熟令某之父與蔣伯生因培山左同官舊好。後就養常熟。卒於官舍。伯生輓聯云。治譜付佳兒。感頻年

惠愛吾鄉。白叟黃童都淚下。頽齡逢舊雨。歎此日招尋勝蹟。青山紅樹也魂銷。

道光閒。吳中耆舊。以潘榕皋先生爲冠冕。曾重宴鹿鳴。重宴瓊林。受其姪芝軒尙書一品封誥。年登九袞。始卒。龔季思輓以聯云。九十年魯殿巍然。記曾同世父春闈。先公秋賦。甲乙榜鼎科籍甚。已重沐桂林燕。寶杏苑恩榮。齊梅麓亦有聯云。爲學爲修。爲恂慄。爲威儀。有斐爲文。九十年華。盡衛武一生之事。曰壽曰富。曰康寧。曰攸好。考終曰命。三千世界。集箕疇五福而歸。

林少穆督部。工爲楹帖。而於挽詞尤能曲折如意。各肖其人。如挽蔣礪堂節相。攸銛云。合兩朝宰輔。封圻第一。流人終不忝。培四海賢才俊。又在三師事。有同悲。蓋嘉道兩朝。諸巨公。好汲引人才。宏獎善類者。惟公一人。斯聯洵能舉其大也。又挽孫文靖督部爾準云。海徼樹豐功。水利邊防。廿載宏宣經世略。宮銜隆晉錫。易名延賞。九原還切報恩心。又挽盧敏肅督部坤云。十年三建戎功。帝賴重臣。回犴蠻。皆懾魄。九省七膺節鎮。人懷遺愛。山河嶺海總銘恩。又挽陶文毅督部澍云。大度領江淮。寵辱肯忘。美謚終憑公論定。前型重山斗。步趨靡及。遺章慙負替人期。自注云。公遺疏。有林則徐才識十倍於臣之語。讀之汗下。又挽韓桂舫尙書封云。西曹法律。南紀封圻。溯三朝中外勳猷。范富歐陽同著望。閩嶠稽帷。吳趨杖履。憶卅載因緣。香火李張皇甫愧知名。自注云。公嘗提刑閩中。某爲諸生時。卽以國士相待。又某官吳門。值公里居。尤欣親炙云。又挽陳石士侍郎用光云。德性秉盅。餼兩入瓊林。稽古榮躋卿貳貴。文章崇

軌範。七持玉尺。愛才羣仰老成型。又挽張蘭渚侍郎云。感恩知己兩兼之。擬今春重謁門庭。誰知一紙音書。竟成絕筆。盡忠補過今已矣。憶平昔雙修儒佛。但計卅年宦績也。合生天。又挽顧南雅通政云。風節樹朝端。鳴鳳聲高。爲感恩慈。酬再造。文章驚海內。登龍望峻。更餘書畫重千秋。又挽郭蘭石廷尉。尚先云。三十年人海才名。帝簡方隆。天已召。六千里家山歸夢。親心難慰。子誰依。又挽陸心蘭藩伯言云。臺館式前型。溯中外回翔。直節清嚴。猶在望。藩屏聯宦轍。悵老成徂謝。名賢言行未終編。自注云。時公方輯名賢言行錄也。又挽俞陶泉都轉德淵云。拯溺舊同心。才德兼資。如此循良。曾有幾。籌釐今盡瘁。設施未竟。畢生懷抱向誰開。又挽李蘭卿都轉彥章云。卅三年才不虛生。帝簡方隆。誰料謫仙歸紫府。重五節。樓難續命。名心未暝。應教詞客祀紅橋。又挽廖竹臣郡丞鴻苞云。卅年來同譜同舟。忽魂歸縹緲。峯前轉悔。量移空借箸。一門內難兄難弟。竟望斷逍遙堂後。不教舊約踐連床。蓋郡丞爲儀卿觀察。鈺夫尙書之兄。適調任太湖同知。卽終於官廡云。又挽游春樊中翰興詩云。薇省早抽簪。憶卅年鍵戶獨居。清品咸推無玷玉。粉鄉常設帳。悵五集編詩未就。蕭辰忽折後凋松。又挽吳和庭邑侯觀樂云。遺愛遙傳三竺外。吟魂應在二梅閒。蓋和庭令浙中有善政。歸里時卜居謝古梅學士之二梅亭也。又挽江石生邑侯之紀云。去思何武留遺愛。死孝王戎本至情。石生居母喪。以毀終云。岳小瀛宗伯起。以江蘇撫部引疾。旋晉少宗伯。嘉慶己巳薨于位。宗伯居官公正清廉。有伯道之感。爲睿

廟所知。特命公之夫人擇族人之子爲嗣。先是宗伯因族人寥寥無當意者。具遺摺以聞。至是夫人亦不願。睿廟亦不之強。乃命大宛兩縣于春秋致祭以爲例。洵曠典矣。紀文達師以聯輓之云。剛峯原不隨流俗。孝肅何須有後人。非此大手筆。不能相稱也。

孫寄圃相國。輓黎襄勤河帥世序聯云。隻手障狂瀾。立德立功。水土平成君不朽。八年聯舊雨。如兄如弟。芝蘭凋謝我何堪。相國不以書名。而手寫此聯。大字如斗。莊嚴合矩。儼如其人。時余官袁浦。曾親見之。史望之尙書。與康蘭皋中丞紹鏞。同年相好。中丞卒。尙書寄聯輓之云。同譜最相親。憶白髮青燈。昨歲尙陪連夜話。名山期共往。歎太行盤谷。此生無復並驂游。

謝默卿曰。陶文毅公之薨也。獻輓聯者。以數百計。佳者不可悉數。最後聞人傳述一聯。獨能舉其大。徵其實。惜忘卻撰者姓名也。句云。答眷恩。智勇忠勤。凡如籌海運。策河防。改鹽政。諸大端。皆我公力瘁。封疆事業。稱三江柱石。持政體。和平寬厚。尤以培士氣。察民隱。勵官方。爲先務。聽此日哀闐衢市。英靈仰萬古雲霄。按齊梅麓輓陶文毅公聯云。以寬厚孚民望。以忠誠結主知。敬賓朋。體僚屬。教育英才。二十年節鉞尊嚴。未改書生面目。爲畿輔急糧儲。爲東南興水利。拯災黎。化梟徒。恤慈孤幼。數千里旃幪蔭庇。何殊菩薩心腸。亦傑構也。

陶雲汀。陳芝楣。先後沒於江南任所。龔季思輓陶聯云。節署久宣勞。公爾忘私。盡瘁遽聞歌薤露。草廬留

賜翰賞延于世。印心好爲嗣。芸香蓋公所居。印心石屋。曾奉御筆親題也。又輓陳聯云。廿載報君恩。真不負。日下探花。江南秉節。卅年敦友誼。最難忘。吳中分袂。漢上題襟。陳爲季思典。試湖北所得士。又季思視學江南時。陳維藩吳下。曾連日侍從游山云。

揚州羅茗香。由大江溯流而上。訪陳仲雲藩伯於江西行省。而藩伯已先期歸道山。茗香哭以聯云。追思患難相依。感適館授餐。談經講學。薪傳已閱廿年。詎者番頻阻風帆。致我遲來。空展遺容成沒世。可惜封圻未轉。算巡方煮海。陳臬維藩。棠蔭僅留三省。慟此際纔停露冕。值君小極。誤投蠲痺喪斯文。蓋藩伯患臂痛。醫家誤用蠲痺湯十劑。遂不起。故末語云然。

王文簡公引之。丁其父懷祖先生憂去位。服闋還朝。署工部尙書。未幾卽薨。英煦齋師輓以聯云。下筆已千秋。稽古共知尊漢學。還朝能幾日。考工惜未補周官。

劉芙初同年嗣綰之夫人。卒於七夕。適值立秋。齊梅麓輓以聯云。河漢隔雙星。可是仙家好離別。梧桐飄一葉。若爲詞客助詩懷。

屠琴鵑俾以儀徵令。引疾家居。忽奉旨特授九江府。未赴。卽客死揚州。齊梅麓輓以聯云。一病負殊恩。九派清江懷太守。十年成大覺。二分明月弔詩人。

陳雲伯邑侯文述之母。終於吳中。齊梅麓輓以聯云。九熊助苦。封鮓資廉。有是母。乃有是子。隔幔傳經。居

樓授史聞其語。今見其人。

王竹嶼都轉鳳生爲葑亭給諫之子。長於吏治。由丞倅驟晉監司。未竟其施。旋登鬼錄。齊梅麓輓以聯云。受寵轉愁顏。歷官河北淮南。濟世經綸殊未展。訂交從總角。重過三山二水。賞心詩句與誰論。

萬小廉啓。廉山郡丞之子。甫由部郎擢御史。遽卒。遲一月而廉山亦逝。齊梅麓輓以聯云。三尺好頭銜。執簡無緣報國空。懷萬言疏。一家大手筆。修文有命。奉親先赴九重泉。

郭韻泉文匯。薨於粵西臬任。先十日已擢方伯。韻泉不及見也。其易簣日時。悉與誕辰相合。余初囑余小霞代製一聯云。寅誼託苔岑。持平遠比于公獄。漢郭宏治獄平允。人比東海于公。法星沈桂管。遺愛應刊有道碑。下二語

皆切其姓也。後數日而部行新命始至。復令改製一聯云。來去有前因。遺範難忘聯襖日。寬嚴能並濟。新恩惜在蓋棺時。則面面皆到矣。陳蓮史方伯聯云。知醫卻老。執法忘劬。看麈牘丹爐。晷影苦無清暇候。優許養痾。殊榮晉秩。緬匡廬庚嶺。星文竟墮碧雲閒。亦旁皇周浹之作也。

朱蘭坡輓顧南雅聯云。魏闕鑒誠衷。建議詞臣追汲黯。滇池施善教。酬恩祀典泣侯芭。一言其在翰林。屢上封事。一言其督滇學。時教士如親子弟。滇人感之。爲力請入名宦祠也。又周敬修督部天爵。爲蘭坡所得士。其母封一品夫人。年踰九袞。督部緣事譴戍。將出塞。旋發往粵東軍營効力。在途聞訃。奉旨准回家穿孝百日。然後行。蘭坡寄輓以聯云。珈服寵榮多。上壽始教歸葢府。墨綬軍旅亟。中途猶許泣護幃。

何玉田孝廉。輓方茂才壯猷聯云。傷心酒國流光短。回首名場恨事多。方好飲。人有抄其文登第者。故云。齊梅麓有自題生壙詩。蔣伯生極爲歎賞。謂可抵梅花萬樹。近二人同建白蘇祠。屬梅麓爲聯云。中有仙龕虛一室。更邀明月作三人。甫書寄而伯生已逝矣。梅麓寄以輓聯云。丹青徧鄧尉羅浮。繞墓植梅花。來去原從衆香國。俎豆傍白公坡老。作祠倚修竹。海天還有一仙龕。蓋仙龕一室。遂成讖語。亦奇矣哉。近人孔孝廉傳金。爲其庶母持三年服。集經語爲輓帖云。慈母如母。貴父之命也。顧我復我。鬻子之閔斯。字字如生鐵鑄成。可謂不刊之作。

鄭仁圃曰。里黨中有林姓婦。素通文理。中年遽卒。相傳其自輓一聯。出語告夫。對語教子。悱惻動人。亦可傳也。其詞云。我別君去。君何患無妻。倘異時再叶鸞占。莫謂生妻不如死婦。兒隨父悲。兒終當有母。願他日得酬烏哺。須知養母卽是親娘。又饒心耕有輓其妻聯云。本八字安排。以致累卿貧到老。作一番打算。自然先我死爲佳。此合前一聯讀之。皆堪酸鼻也。

鄭仁圃素工楹帖。里居福州時。凡親朋輓聯。多其手製。知余欲續編聯話。因錄其舊作相寄。中有曲折盡意者。如挽何玉田孝廉云。君乃長於情者。爲戚友關心。終歲勞人草草。文固無如命也。以孝廉沒世。當今天道茫茫。又云。閱歷名場。終竟才人無福命。消磨心力。祇緣文債與親情。又云。人情欲贈方干第。天意原慳李賀年。又輓許畫山邑侯作屏云。披叔重舊文。馴雉歸來經笥富。游旌陽遺愛。化鳧仙去口碑傳。

又輓林鈍村孝廉一桂云。三千卷勤抄。耄學宛如沈麟士。八二齡老宿。典型頓失魯靈光。又輓張洲山明經登瀛云。吟成三影清詞。但化竟同蝴蝶夢。謝卻九秋芳信。催歸忍聽鷓鴣聲。明經時客光澤。因赴秋試。抱病歸。至家一日而卒。又輓言可樵邑侯朝標云。千里銜哀。奉靈舉言遄。驚說莪詩初罷誦。廿年遺愛。悵絃歌遽息。慘教棠樹不成陰。時邑侯正丁憂。將扶柩歸里也。邑侯常熟人。言子賢裔。又輓許子密茂才作樞云。庚宿掩霜晨。黃菊叢中添淚雨。卯橋嗟月夕。紫藤庵畔景光風。茂才家有紫藤花菴。卽許甌香先生友舊蹟也。又輓廖封翁云。卿靄煥朱門。石奮郎君皆貴仕。仙風飄絳節。劉綱夫婦並歸真。封翁夫婦。一月中相繼而逝。卽鈺夫儀卿二太史之父母也。又輓林母云。教成諸子盡揚眉。咸使備賓興德藝。看入三場纔瞑目。不教遲喆嗣科名。時有子四人皆應舉。母沒於八月十四夜。則諸子皆入闈矣。何仙槎尙書凌漢。終於位。賜諡文安。謹考我朝諡文安。前此僅有兩人。一爲孟津王尙書鐸。一爲掖縣張閣老端。蓋百十年來易名之典所僅見也。汪少海仲洋輓以聯云。踐道一身兼貫乎言功者德。易名當代少止於義理曰安。又錢心壺給諫儀吉聯云。淵雲大文。趙張爲政。奮建家風。時望兼漢廷數子。省臺故事。都邑謳思。門牆述訓。令名傳荆國家風。贈尙書輓聯者甚多。皆二三十十字巨製。惟此兩聯。更爲沈著耳。潘雲浦封翁。芝軒相國之父也。相國以尙書乞養十年。而封翁始歸道山。張蘭渚中丞。輓以聯云。一品荷崇封。北斗尙書徵燕翼。八旬尊上壽。西方生佛想螺容。

朱蘭坡曰。余嗣母貞節。汪太宜人棄養。同宗同年。寶應文定公寄輓聯云。在女而貞。何異西山采薇。未仕抱爲臣之節。誨子能似空令南陔菽黍。曰歸與失母之悲。又同年李芝齡總憲。輓本生母趙太宜人云。記事圖成。百日孤兒。紉雪夜。陳情疏達。三年兩母。痛泉臺。此聯一謂余三月餘而孤。本生母鞠育之苦。嘗作雪夜紉兒圖以記其事。一謂在上書房。遞摺告養。竝言兩母。仰蒙恩准。未至家。已聞貞母之訃。踰二載而本生母又逝也。切當不易。讀之。猶涔涔淚下。

吳門陳竹士之室金。纖纖才女也。聲震一時。著有瘦吟樓稿。早卒。汪宜秋女士輓以聯云。入夢想從君。鶴背恐嫌凡骨重。遺真添畫我。飛仙可要侍兒扶。人爭誦之。其繼室王梅卿亦工詩。合卷之夕。詩僧懶雲戲製一聯云。幾生修得到。一日不可無。可稱雅諳。

嚴問樵有一妹。適余生。次年三月產一女。隨以四月八日亡。問樵哭以聯云。佛不慈悲。失乳忍聽遺女哭。兄兼負病。傷心更恐二人知。

嚴問樵有姬人沒於清江。問樵哭以聯云。不合時宜。惟有朝雲能識我。獨彈古調。每逢暮雨倍思卿。

楹聯續話

卷四

集句集字附

羅茗香曰。朱竹垞先生。舊有集句楹帖云。人道君如雲裏鶴。自稱臣是酒中仙。惜未詳所贈何人。劉金門先生。自出塞至賜環。凡閱三載。歸後集杜句作聯云。三年奔走空皮骨。萬古雲霄一羽毛。所至皆懸於壁。見者無不稱其工妙。然次句究嫌其夸也。

萬廉山郡丞。喜蓄奇石。大有米海岳之癖。嘗以峨眉積雪石。自鑄此四字。贈唐陶山方伯。方伯集句爲聯以謝之云。何當報之青玉案。可以橫絕峨眉巔。

謝椒石曰。眞州察院。舊爲鹽政。按部時掣鹽公所。內有戲臺。曾賓谷中丞煥。有集句聯云。粉澤大猷。元黃裨說。雲霞萬影。絲竹千聲。戲臺聯之莊麗。無踰此者。

阮芸臺師。有別墅在邵伯湖之北。湖塢植柳三萬株。自額所居曰南萬柳堂。以別於京師之萬柳堂也。沿湖魚利。甲於江北。師嘗集句自題堂聯云。君子來旂貫及柳。牧人乃夢衆惟魚。以石鼓文對毛詩。自然名

貴。

黃右原比部。索余撰句贈聯。比部博學好文。在淮商家為別調。余集韓詩外傳及漢書河閒獻王傳語與之云。虛己受人。彼其之子。殊異乎族。實事求是。夫惟大雅。卓爾不羣。邗上人多不知所謂。惟芸臺師以為無虛譽也。

余前編叢話。有輯漢碑句十餘聯。黃右原比部見之。以為未盡。因手錄一帙示余。蓋余前據敝齋現藏揚

本為之。右原則從隸釋隸續中推廣得之。今亦擇錄如左。彌覺古香襲人也。其四字云。令儀令色。允武允

文。逢盛碑。魯峻碑。為國楨幹。配曜岳嵩。范鎮碑。郭仲奇碑。敦詩悅禮。含謨吐忠。西狹頌。孔憲碑。剛毅多略。文雅少疇。丁勳碑。

仲奇碑。種德收福。幹國棟家。張公神碑。州輔碑。廣祈多福。博覽羣書。孟郁碑。魯峻碑。姿兼申甫。德倅產奇。張納碑。劉熊碑。

智含淵藪。絜如珪璋。度尚碑。唐扶頌。比蹤豹產。膺姿管蘇。魯峻碑。范鎮碑。為國楨幹。作主股肱。郭仲奇碑。樊安碑。行義高

劭。體性溫仁。費鳳碑。孟郁碑。文艷彬彀。風曜穆清。趙圍令碑。祝睦碑。翔風膏雨。左書右琴。孟郁碑。馬江碑。耽樂術藝。擘斂

吉祥。丁勳碑。華山碑。剖演奧藝。恬忽世榮。校官碑。侯成碑。鈞河撻維。奉魁承杓。史晨碑。石門頌。應運挺度。通神達明。郭究碑。

祝睦後碑。篤禮崇義。抱淑守真。高彪碑。景君碑。天與厥福。世有令名。禮器碑。耿勳碑。八字云。躬潔冰雪。夷然清皓。性發

蘭石生。自馥芬。祝睦後碑。帝堯廟碑。學為儒宗。行為士表。愛若慈父。畏若神明。魯峻碑。劉熊碑。內懷溫洞。外撮強虐。功

綿日月。名勒管絃。魯峻碑。帝堯廟碑。以義抑彊。以仁恤弱。乃台吐曜。乃嶽降精。唐扶頌。楊震碑。威隆秋霜。恩踰冬日。言

合雅謨。慮中聖權。樊毅碑。譙敏碑。

十字云。言不失典術。行不越矩度。威以懷殊俗。德以化圻民。楊統碑。費鳳碑。

黃右原又錄其集句。集字楹帖見示。因復擇其尤佳者如左。如云。鵲笑鳩舞。大喜在後。麟子鳳雛。和氣所

居。桂柏棟梁。麟鳳堂室。雍涼朱草。文山紫芝。達性任情。得其歡樂。布政施惠。拜為公卿。以上焦氏易林。金

石九莖。木禾六秀。明珠一寸。白玉四環。鮑照河清頌。庚信謝賜布啓。瑞林朋生。祥禽輩作。卿雲似蓋。甘露如珠。鮑照

頌。徐陵勸進表。珠角擅奇。山庭表德。天球並價。日觀同光。庚信齊王憲神道碑。李商隱獻集賢相公啓。論史可聽。談元愈默。幽居

少事。野性多閒。宋之問禊飲序。王勃游蓮池序。璣鏡照臨。山河容納。風質洞遠。儀止祥華。庚信齊王憲碑。沈約齊司空行狀。立行可

模。置言成範。徽猷克著。聲績聿宣。沈約齊昭王碑。文略寶王上崔長史啓。組織仁義。琢磨道德。棟梁華夏。舟楫江河。劉峻廣絕

交論。庚信齊王憲碑。鏡文虹於綺疏。浸蘭泉於玉砌。握珠胎而冠月。振瓊樹而韜霞。王融曲水詩序。王勃上馬書。玉樹以珊

瑚。作枝珠簾。以玳瑁為押。赤雁與斑麟俱下。醴泉與甘露同飛。徐陵玉臺新詠序。庚信賀新樂表。又集唐人句云。四時

最好是三月。萬里誰能訪十洲。韓偓李商隱。金鈴玉佩相磋切。珠蕊瓊花鬪剪裁。李紳王初。黃金盒裏盛紅雪。

碧玉盤中弄水晶。王建郭震。又集蘭亭序字云。將相風和天地靜。修齊事大古今同。契古風流春不老。懷

人天氣日初長。今居古稽極樂事。外和內峻大賢風。流水長亭春風靜宇。幽蘭一室修竹萬山。修

竹抱山。春亭映水。幽蘭得地。虛室當風。遷固同文。惠列殊抱。管樂佐世。老彭引年。臨類咸和。取諸無

妄。隨時觀感。咸與同人。合室能文。自是盛事。放生為樂。可得大年。虛能引和。靜能生悟。仰以察古。俯

以觀今。

鄭仁圃寄余集句聯數紙。中有可錄者。如云。左酒右漿。喜疊其室。伯歌季舞。福爲我根。合匏同牢。宴樂

有緒。駕福乘喜。昏悅宜家。

以上焦氏易林。

小園新展西南角。和氣先熏草木心。

放翁半山。

平生獨以文字樂。此日

翛然水竹居。

宛陵朱子。

煙樹遠浮春縹緲。風船解與月徘徊。

文潛朱子。

深林閒數新添筍。殘燭貪看未見書。

放翁。

山谷。五畝自栽池上竹。一尊徑醉溪中雲。

東坡誠齋。

道光改元。詔開孝廉方正科。吳江縣以翁君海村應舉。羣稱公允。有以集句聯贈之云。聖代卽今多雨露。

先生有道出羲皇。

鄭仁圃嘗擬作軍機直房春聯集句云。春爲一歲首。月傍九霄多。同人皆以爲工。惜未懸挂。又嘗集句作

閩浙分水嶺。交際處。聯云。半嶺通佳氣。他鄉有勝緣。亦擬而未挂。又於九江府天后宮牆外集句一聯云。

潮平兩岸闊。花滿九江春。蓋牆外臨大江。牆陰則花園也。

姚亮甫中丞。由豫藩量移山右。時汪碧山方伯如淵。集詩經句贈之。聯云。旣傲旣戒。惠此中國。來句來宣。

至於太原中丞。極稱其工切。

京師和春部戲館門外。有集句聯云。和聲鳴盛世。春色滿皇州。天然莊麗。云是張船山太守問陶所撰。

孫柳君錄寄所集古樂府五七言聯。古雅可喜。如。晤言紛在矚。惠心清且閒。巫山高。日出東南隅。行。端景緣直表。

茂實偶英聲。上邪篇。恪勤在朝夕。俯仰愧古今。蒲生行。金石響高宇。桂松比真風。遠期篇。智理周

萬物。遠懷柔九州。伯益鯁。清川含藻景。丹華耀陽林。日出東南隅。春秋補小月。山水有清音。折楊柳

子夜四時歌。語默寄前哲。邂逅承清塵。折楊柳行。仁聲被八表。妙花開六塵。朱鷺篇。含情結芳樹。揜香

散名花。芳樹篇。平生懷直道。大化揚仁風。白頭吟。沙棠作舟楫。浮雲似帳月如鈎。梁元帝烏

帝鳥樓曲。凝華結藻久。延立彈琴鼓。瑟聊自娛。白紵歌。縈絃急調切。流徵迎歌度。舞遏歸風。秦箏

余在桂林。習見陳蓮史。所作楹帖。語多古異。閒詢之。始知其暇中。輯有五七言舊句三百餘聯。手寫一帙

見贈。茲擇其尤佳者。錄之如左。五言云。容光無不照。懷古亦何深。張曲江。衛門羅戟檠。遂性各琴尊。韓

之蘇東坡。榮華肖天秀。談笑安邊隅。韓。天材任操倚。經訓乃菑畲。蘇。文章自娛戲。忠義老研磨。韓。文

章開窈奧。節制收英髦。杜。避人焚諫草。彈劍拂秋蓮。杜。遠意發孤鶴。恩波起涸鱗。蘇。傳家有衣鉢。

聽履上星辰。蘇。經綸皆新語。鸞鳳本高翔。杜。上客能論道。虛懷只愛才。右丞。奇書窺鳥跡。賜茗出

龍團。放翁。高文有風雅。新渥照乾坤。右丞。肝膽不楚越。眉宇真天人。李。塵襟諒昭洗。賢路不崎嶇。

朱子。雲霞成伴侶。冰雪淨聰明。右丞。頃來樹佳政。時還讀我書。東野。銘心對敬器。含笑看吳鈎。

萬化如大路。一字皆華星。遺山。丹青不獨任。心跡喜雙清。袁暉。風騷共推激。華實相芬苳。杜。機載之。

荊州愛山簡。刺史似寇恂。杜。颯爽動秋骨。廉折配春溫。蘇。心在水精域。直如朱絲繩。鮑昭。高才食

舊德流藻垂華芬蘇子建。桑竹垂餘蔭。珪璋滿清班陶。計闢道愈密。實大華亦榮蘇韓。曠懷掃氛翳。公

論懸日星杜遺山。春夏各有實。魚鳥亦相親杜蘇。朗鑒諒不遠。清言得未嘗韓蘇。時節不可翫。風期誰復

廣韓。文章有定價。邂逅得初心陸韓。卽事已可悅。賦詩何必多杜。所得靜而簡。其人勇且英陸蘇。放

意弄晴快。叩奇獨冥搜蘇東野。唱妍酬亦麗。我適物自閑韓蘇。草聖祕難得。詩人思無邪杜蘇。得盡所歷

妙。應緣不耐閑杜蘇。永路當自勗。清光應更多杜李。得句忍不吐。好古意所耽蘇。量力守故轍。盍胸生

層雲杜陶。守道不封已。擇交如求師杜韓。且從性所翫。庶以善自名陶惠連。佳句喧衆口。古人惜寸陰陶韓。

春耕庶秋穫。茶興復詩心薛曲江。殊姿各獨立。素志庶可求杜蘇。發興自我輩。賞心惟良知杜康樂。達

生幸可託。得句不妨清蘇康樂。蘊真愜所遇。澄慮觀此身杜李。與道本無隔。將詩莫浪傳杜李。自得高蹇

嶮。永言銘佩紳李韓。始得觀覽富。特以風期親李韓。各勉日新志。能爲歲寒姿蘇康樂。力守非有黨。心清

得奇聞陸蘇。爲學務日益。將詩待物華杜蘇。好語時見廣。此身良自如李蘇。未曾一日悶。猶有五湖期香山香。

或製閒居賦。新編雜體詩右丞義山。試吟青玉案。如登黃金臺李杜。士生要宏毅。情在強詩篇陸杜。堅

姿聊自傲。素履期不渝蘇櫛。虛白道所集。靜專神自歸蘇笈七籤雲。黃卷真如律。素琴本無絃李杜。齋騰坐

可致灑掃今其初杜遺山。幽人常坦步。稚子總能文杜康樂。掬水皆花氣。讀書此雲房方元英朱子。縈情無

餘澤。揚論展寸心杜文通。逸氣感清識。良辰入奇懷杜陶。服理辨昭昧。秉心識本源杜遺山。興來每獨往。

道集由中虛。右丞蘇新詩如洗出。好鳥不安飛。蘇卽事須嘗膽。論詩一解顏。杜大哉霜雪幹。得之煙

山春。右丞偶值棲遁跡。何異清涼山。杜兼入竹三昧。時有燕雙高。蘇餘心無采績。對書不簪纓。

牧之鳥鳴時一再。家住水東西。陸飛鳥逐前侶。好峯隱半規。右丞石壁開精舍。瑤華振雅音。曲江

盈長歌白石澗。高臥香山雲。蘇葦管畫柿葉。瓦瓶擔石泉。蘇虛舟任所適。飛鳥相與還。襄陽

荷鋤覘泉脈。移石動雲根。右丞海石分棋子。江波近酒壺。義山彈琴復長嘯。讀書仍隱居。右丞逢

人覓詩句。留客聽山泉。遺山翰墨三餘隙。陂塘五月秋。盈川疎峯抗高館。穩字入新聯。康樂雲岫

不知遠。花房未肯開。東坡詩眼自增損。德容自清溫。東坡麗書因閱畫。閒坐但焚香。司空圖七言

云。光芒六合無泥滓。濡染大筆何淋漓。少陵別裁僞體親風雅。徧謁名山適性靈。少陵官職聲名俱

入手。風崖水穴舊聞名。蘇回看屈宋猶年輩。遠追甫白感至誠。義山詩筆離騷亦時用。文章爾雅稱

吾宗。蘇鐘鼎山林各天性。風流儒雅亦吾師。杜詩情逸似陶彭澤。勳業終歸馬伏波。少陵文學縱

橫乃如此。金石刻書臣能爲。山谷守道還如周柱史。著書曾學鄭司農。牧之憶事懷人兼得句。引杯

看劍坐生風。義山曲江山水聞來久。庾信文章老更成。韓數問舟船留製作。更無書札到公卿。少陵

英亦能畫馬窮殊相。欲遣吟人對好山。少陵自把新詩教鸚鵡。戲拈秃筆掃驩驩。陸但酌此泉勝

酌酒。勸栽黃竹莫栽桑。放翁千首新詩一竿竹。牆西明月水東亭。陸詩翁愛酒常如渴。草堂少花今

欲栽蘇杜重之不減錦繡段。邀我共作滄浪篇。少陵永叔作詩賀我得石友。曲肱聽君寫松風。石湖山谷萬卷

藏書宜子弟。一日過海收風帆。山谷少陵春工遇物初不擇。酒聖于吾亦庶幾。放翁牧之一家喜氣如春釀。小

築幽棲與拙宜。蘇陸酒令雖嚴莫噴虐。草書非學聊自娛。山谷東坡每聞佳士輒心許。不辨仙源何處尋。放翁

右丞前身應是梁江總。百歲須齊衛武公。義山牧之

楊芸士亦錄寄所集古樂府楹聯與孫柳君所錄寄者。十有八九相同。殆皆有所本。故不復登。其集易林

八字聯云。大福允興。主母喜舞。長樂受庇。使君延年。歡喜堅固。保我金玉。福祿祺祉。樂以笑歌。千歡

萬悅。貴壽無極。五福四利。喜慶大來。皆吉語也。又集古詩句五言云。典墳探奧旨。詩禮挹餘波。錢起盧綸

知音在霄漢。時分占風煙。耶士元白居易聽琴知道性。避酒怕狂名。姚合李德裕李杜文章在。荀陳地望清。鳳

棲常近日。鶴夢不離雲。錢起盧綸文章負奇色。事業富清機。陳子昂杜少陵翰墨緣情製。山林引興長。孟浩然杜少陵

七言云。合沓聲名動寥廓。縱橫逸氣走風雷。杜李功業須當垂永久。行藏爭不要分明。牛融李咸用花房露

透紅珠落。桂樹風吹玉簡寒。溫庭筠曹唐雲生礪戶衣裳潤。窗近花陰筆研香。香山黃庚

張仲甫中翰應昌。聞余續輯聯話亦以舊時集句十餘聯錄寄。如靜坐觀衆妙。端居味天和。太白朱子松柏

有本性。林園無俗情。公幹靖節結念屬霄漢。委懷在琴書。康樂靖節萬事已華髮。一身爲輕舟。常建東坡江湖萬

里水雲闊。草木一溪文字香。林景熙汪元量入妙文章本平淡。逸羣翰墨爭傳誇。戴復古僧惠洪玉琴瑤瑟倚天半。

白波青嶂非人閒。誠齋東坡文章清逸世少比。胸次廣博天所開。穎濱半山園中草木春無數。湖上山林晝不

如。東坡靖詩墨淋漓不負酒。江山雄麗洵宜人。林景書穎濱春能蘊藉如相識。風入襟懷只自知。方岳寒香

嚼得成詩句。新月邀將入酒杯。張耒方岳又集得一聯云。陰陽風雨晦明受。之以節。夢幻露電泡影作。如是

觀亦以經對經。渾成可喜。

鄭仁圃曰。曾見黃莘田先生。有集句數聯。極工整。如平生能著幾兩屐。長日惟消一局棋。數點雨聲風約

住。一枝花影月移來。柳搖臺榭東風軟。花壓闌干春晝長。勸君更盡一杯酒。與爾同消萬古愁。

蔡佛田工作楹帖。亦喜集成語爲之。今從紫荆樹館雜著中錄其佳者。如集詩品云。水流花開晴雪滿。竹

柳陰路曲過雨采蘋。紅杏在林如有佳語。碧桃滿樹良殫美襟。落花無言幽鳥相逐。可人如玉清風

與歸。明月雪時金尊酒滿。風日水濱。碧山人來。紅杏在林。疎雨相遇。碧桃滿樹。清露未晞。脫帽看

書。生氣遠出。杖藜行歌。妙造自然。流鶯比鄰。如有佳語。晴雪滿竹。冷然希音。如氣之秋。窈窕深谷。猶

春于綠。荏苒在衣。書橋碧陰。觀化匪禁。綠杉野屋。幽行爲遲。夜渚月明。所思不遠。柳陰路曲。妙造自

然。集元遺山句云。日從少傅論中隱。擬問靈君乞上池。寄楊弟正卿鵝山神應王廟白雪任教春事晚。貞松惟有

歲寒知。寄答飛卿謝常君卿空谷自能生地籟。吟毫端合染溪光。空山七重寶樹圍金界。千里名山入酒船。應州寶宮

寺太白獨酌圖。世外原無衆香國。花陰真是小華胥。雲巖醉貓圖搖筆尙堪凌浩蕩。題詩端爲發幽妍。明日作野菊

撐腸文字五千卷。試手清涼第一篇。寶章小集。玉樹瑤林照春色。物華天寶借餘光。送仲梁出山。又

集宋人句云。藏書萬卷可教子。買地十畝皆種松。山谷。萬壑松風和澗水。十分煙雨簇漁鄉。誠齋。日

消殘醉閒吟裏。夢入青藤古木閒。朱子。盡捲簾旌延竹色。想銜杯酒問花期。石湖。榜花行酒發新唱。解

帶量松長舊園。君謨。養氣不動真豪傑。居心無物轉光明。朱子。酌酒賦詩相料理。種花移石自殷勤。

章齋。謨議軒昂開日月。文章浩渺足波瀾。藥圃。吾山自信雲舒卷。片心高與月徘徊。放翁。幾多怪

石全勝畫。無限好山都上心。詹中正。林花經雨香猶在。芳草留人意自閒。萊公。林罅忽明知月上。竹

梢微響覺風來。放翁。能招過客飲文字。亦把湍流替管絃。半山。是處登臨有風月。略無蹤跡到波

瀾。放翁。樓臺近水涵明鑑。琴酒和雲入舊山。簡齋。已辦青鞋爲老圃。細傾白墮賦新詩。朱子。舊書

不厭百回讀。佳客時來一座傾。東坡。山泉釀酒香仍冽。芳草留人意自閑。誠齋。除卻讀書無所好。恍

如造物與同游。放翁。要知作詩如作畫。但願對竹兼對花。復古。供家米少因添鶴。送酒人多不典衣。

放翁。紫荆樹館雜著中。又有集句一聯云。積善云有報。在涅貴不緇。上句陶淵明飲酒詩。下句崔子玉座右銘。

最爲名貴。按此十字。余曾於紀文達師廳事見之。忘其署款何名。似不始於佛田。

何子貞太史紹基工書。無帖不摹寫。尤喜臨爭坐位帖。每集帖字作楹聯至百十付。茲擇其尤工穩者。錄

之如左云。心同佛定香煙直。目極天高海月升。美富文才傳左國。清微畫品數南宗。直諒喜來三徑友。縱橫富有百城書。未須百事必如意。且喜六時長見書。真輔相才葵向日。大光明地月當門。聖業須參齊魯論。尙書並校古今文。校書得理目如電。直節能光心比金。今既見心卽見佛。子安知我不知魚。知人其難九德貴。聞過則喜百世師。家藏古史存疑是。天與高文割愛難。畫本紛披來野意。文辭古怪亦天真。指麾文府才思盛。冠冕人倫道德尊。金臺名士高前席。紫府真人校異書。同心不隔一片月。時論惟高尺五天。兩京六朝富文史。三高八及挺才名。俛仰情文今與昔。縱橫論列直而和。心光明定得初月。畫本依微來晚煙。情文欲共尊彝古。志節應爭日月光。人傳三異真名吏。古者九能可大夫。正言須比魯宗道。高士爭如張志和。長官且喜傳三異。宰相還同論十思。人品比南極出地。此心如大月當天。無端開合電明野。不事安排月到天。月寮煙閣標清興。文府書城縱道心。身修天爵貴無比。心有菩提香益清。特立獨行有如此。進德修業須及時。悅心未厭無名畫。積行唯收有用書。友來輒入論文座。書就還思作跋人。入世須才更須節。傳家積德還積書。子瞻邵喜文與可。魯直深知李伯時。當如曾子曰三省。更爲張公加半思。烟清忽見一勾月。人定微聞百和香。厭心悅目情文極。入地參天理數明。習勤不置能損欲。聞過則喜真得師。居安思危介節見。積疑得悟清光來。前席爭傳宣室對。等身唯守魯堂書。五香佛海真無地。百尺書城半倚天。愛

道天開文府貴。無心月到畫堂深。聞道何時常恐莫。置身有地未辭高。事到從容能合度。路當偏側敢依人。深堂有月同參佛。清畫無人自檢書。聞道真人在姑射。願從古佛入菩提。謹其常而權自足。深於情者才始真。名書古畫不易得。月閣煙寮相與清。卻爲今疑思苦悟。須從異論見同心。書有魚傳人咫尺。門唯爵到地清高。到從月地參真佛。且據書城作寓公。清香滿堂佛應喜。明月出海天爲高。才名挺出如東野。佛理清深是子瞻。率意不知行徑晚。遂心時得異書藏。尙論情深容竊比。清修道合悟真如。九品論存中正意。六書理悟史皇初。高士還如戴安道。鄉侯合置王無功。功名蓋世不矜伐。道德積身惟敬誠。誠存修省取諸震。德積高大貴能升。置身古人敢不勉。美利天下終無言。開尊忽見前身月。用世猶存半部書。兩世勳名郭僕射。一家書畫李將軍。才名震溢李供奉。畫理清深王右丞。道心尙見今猶古。辭令能無抗與卑。校理異文天祿閣。從容清績蓋公堂。古文獨祖衛東海。八分特數師宜官。高位尙須聞過友。美名不廢等身書。姜小枚明經舉。有集蘇數聯亦尙渾成。如高懷尙友漆園叟。後學過呼韓退之。仙心欲捉左元放。大草閒臨張伯英。前身自是盧行者。伴直難呼孟浩然。小詩試擬孟東野。款段曾陪馬少游。且與揚雄說奇字。要令安世誦亡書。書似西臺差少肉。詩如東野不言寒。成佛莫教靈運後。作詩猶是建安初。行樂及時惟有酒。無言對客本非禪。元亮本無適俗韻。東坡也是可憐人。沽酒獨教陶令醉。狂言

屢發次公醒。萬事會須咨伯始。一班我亦愧真長。高會日陪山簡醉。題詩誰似皎公清。魏春松侍御成憲。欲集一齋聯。先有杜句云。古來才大難爲用。而難得對句。其姪滋伯廣文。諱升。用放翁老去詩名不厭低句足成之。

雜綴諧語附

柳南隨筆云。馮定遠班嗜酒。適學使者歲試。扶醉以往。學使以後至詰之。蓋猶在酒所。不知所云也。學使大書一醉字於卷面以授之。隸人扶入號中。據几酣睡。至放牌。聞砲聲。然後驚醒。四書題爲今夫弈之爲數小數也。定遠因作弈賦一篇。經文五篇。伸紙疾書而出。案發。名列六等。定遠大書一聯。榜於中堂云。五經博士六等生員。

鈕玉樵曰。康熙中顏方伯敏。裁缺家居。久不得調。嘗語人曰。吾向在西秦。元旦假寐。夢乘官舫。舫中白榜青書。有月臨波作案。雲倚樹爲屏之聯。出觀兩岸。紳士稠雜。皆云迎方伯公者。行已至廣西界矣。十年前曾有此兆。異時當補粵藩。他非所望也。未幾果然。

蘇州府屬之崑山新陽。兩縣同城。而新陽本由崑山分出者。適有蘇邑侯於城隍廟內。構舒嘯堂新成。曹地山先生爲題楹帖云。縣析崑山。此地可名瑤圃。人來子美。有亭重問滄浪。人皆稱其工切。

黃右原曰。楹聯叢話前編。載吳山尊題友人別業楹帖云。淥水漾丁簾。增我輩閒中風致。名園依丙舍。祝

君家看到雲仍。按別業卽巴園。本與塋地相近。故對語有丙舍云云。園中牡丹最盛。原作花節過了香喜。我至剛逢殺雨。名園依丙舍。願君家看到仍雲。蓋語語關照牡丹。而丙丁雲雨。屬對尤爲工緻也。

鄭仁圃曰。吳緒五邑侯。久權九江府參軍。與余寅好最篤。復兩權德化令。遂實授。余贈以聯云。十年庾亮樓頭。曾許登牀同玩月。兩度陶潛徑畔。未能愛菊且栽花。緒五得之。甚喜其雅切。

宋悅研侍郎鑄。觀察皖中時。嘗書一聯。贈某上人云。看梅子熟時。箇中人酸甜自得。聞木樨香否。門外漢坐臥由他。侍郎素奉佛。精通梵筴。用彼法語絕工。

黃右原曰。從來聯語。紙書居多。或刻以竹木。或用漆加雲母石。且有嵌牙玉者。至吳山尊學士。始出意製玻璃聯子。一片光明。雅可賞玩。惟字畫不能無反正之嫌。學士又運其巧思。使之表裏如一。其句云。金簡玉冊自上古。青山白雲同素心。上製一橫額。題幽蘭小室四篆字。又請孫淵如觀察。以雙款篆書山尊先生孫星衍七字。正面反面。並是一樣。其巧不可階如此。

羅茗香精於算學。粵東黎見山。贈以楹聯云。紹仁卿漢卿絕詣。兼曉菴勿菴苦心。蓋中法之勝於西法。以天元四元爲最。其術始於宋元時。李仁卿治測圓海鏡。朱漢卿世傑四元玉鑑。自明季算事寢失。國初吳江王曉菴錫闡宣城梅勿菴文鼎。擘幾探蹟。絕學復昌。今惟茗香能治其書。故黎見山據實稱之。見山乃李四香高弟。皆數學名家也。阮儀徵師相。亦贈茗香楹句云。推步大圓立元以四。理董小篆建一爲

崑茗香近有春秋朔閏異同考。余曾讀而敘之。

彭春農學士邦疇。六十壽聯。少當其意者。學士意欲切彭姓。並欲切江西。黃右原比部。適在其門。因考彭姓之非其先族者。惟前明彭先生公望最著。非但如本朝蘇州彭氏。僅以科名起家也。乃獻一聯云。詩集擅千秋。宰相祖風開八百。易堂宗九子。翰林鄉望邁尋常。學士以杜詩尋常對七十。此聯寓望七之兆。得之甚喜。

謝椒石曰。金瓶芍藥三千朵。玉軸琵琶四百弦。此宋教坊大使袁綯句。見於浩然齋雅談。乾隆間。揚州游客。有書作柱聯以謁某商者。商喜。遂厚贈之。想見彼時商家窮泰極侈。故於此等語獨有當也。若今時則不然矣。

有爲關帝廟戲臺聯云。顧曲小聰明。當日可憐公瑾。搥鼓大豪傑。至今猶罵曹瞞。此的是關廟戲臺。若移向他廟戲臺。則不知所指矣。

楊蓉裳芳燦。爲隨園老人弟子。最工倚聲。錢梅溪贈之聯云。百首新詞填白石。一枝妙筆補倉山。兩淮都轉署中戲臺聯云。新聲譜出揚州慢。明月聽來水調歌。最爲雅切。移向他處。便無謂矣。

鄭板橋有贈焦山長老聯云。花開花落僧貧富。雲去雲來客往還。今此聯墨蹟猶存山中。陶文毅公贈錢次軒先生拭聯云。人言此老古開士。我生之初新翰林。蓋錢爲戊戌翰林。而公適生於戊

戊也。

蔡佛田當四十九歲時集宋句爲聯云。四十九年窮不死。三百六日醉如泥。語意曠達。其實佛田家不甚貧。飲酒亦未嘗及亂也。

英煦齋師集蘇句贈廖儀卿鈺夫昆弟聯云。高才何必論勳閥。壽骨遙知是弟兄。殊工切。

吳門滄浪亭畔有大雲菴。六舟上人主之。六舟名達。受海寧人精於金石篆刻之學。收藏甚富。雲臺相國以金石僧呼之。兼工書畫。陳芝楣中丞延主斯席。齊梅麓太守贈以聯云。中丞教作滄浪主。相國呼爲金石僧。嚴問樵邑侯亦爲撰一聯云。商彝周鼎漢印唐碑。上下三千年。公自有情天得度。酒膽詩腸。文心畫手。縱橫一萬里。我於無佛處稱尊。

長洲沈玉生基庶上舍齋中懸一聯云。願與不解周旋客。飲酒難爲不識姓名人。作書乃壽光李崔生所書。錢唐江秬香跋云。此桂未谷集史書中語也。

元和黃穀原貳尹均工書畫。嘉慶閒供奉內廷。有年後出官湖北。淡於進取。引疾歸里。小有園林。日以筆墨自給。有辭官賣畫小印。嚴問樵嘗製一聯爲贈云。關心夜雨疎簾。費半盞寒鐙。爲來日謀朝齋。夕韭。回首春風上苑。臍一枝禿管。與諸君寫近水遙山。穀原大喜曰。此卽余賣畫招牌也。

涇縣包慎伯邑侯世臣擅美才而有狂名。余在江南數年。獨闕延攬。僅讀其所撰中衢一勺。皆治河之崇。

論宏議也。近聞其齋中自題一聯云：喜有兩眼明，多交益友，恨無十年暇，盡讀奇書。其胸次可想。朱朶山殿撰昌頤未第時，見其叔父虹舫閣學侍兒名多多者，心悅之，未敢請也。適此婢索書楹帖，因信筆製一聯云：一心祇念波羅蜜，三祝難忘福壽男。爲閣學所見，欲以婢賜之。婢謂九郎若中狀元，吾當歸焉。明年朶山果大魁，閣學爲成其事。當時傳爲佳話云。

貴陽譚太守光祜有詩名，又善吹鐵簫。程春海學使贈聯云：赤手拔鯨牙，卅載詩名傾海內；深心托鳳口，九天簫響落人間。

又鄭夢白祖琛，由兩淮都轉擢江西廉使，春海贈聯云：玉敦主詩盟，正東閣梅開，墨花全溼，篠驂迎使節；適西山雲起，甘雨重來，蓋夢白方輯錄乾嘉詩，又曾任江西守令也。

石曉田照官楚北，有循聲適喪其兄，悲感形於色。皖江卓振清贈聯云：至性至情，得天者厚，質心實政，感人也深；後俞陶泉德淵在蘇奉諱歸，軍民攀戀不忍舍，平樾峯翰錄此以贈。賀耦耕中丞曰：此兩人皆不愧斯語也。

張伯治曰：記得從前移居，得一楹聯云：到門莫問姓名，花草一庭欣有主；入室自分雅俗，圖書四壁可留人。又曰：陳曼生嘗書一聯見贈云：冷澹古梅如老衲，護持新笋似嬰兒。蓮因絕愛之，卽仿其意，擬得一聯云：古梅蓋屋多盤錯，新筍出林自展舒。余和之云：佳卉移栽如選色，異書借錄抵徵歌。又云：奇書貪錄

如增產佳卉分培當樹人意皆相類。

嚴問樵曰嘗習見書春聯者云槐爲奕世承恩樹杏是春風及第花不知此乃王夢樓先生自署門聯也。原句作槐爲王氏傳家樹杏是唐人及第花先生又構一樓題曰夢樓爲演家樂之所集句聯云人世難逢開口笑老夫聊發少年狂前輩風流發人遐想。

花曉亭方伯有贈人一聯云騎驢尋梅一天風雪對竹思鶴萬古雲霄俊語可喜。

蔡鴻遵選官桂林挈妻赴任道出湘江其伯岳嚴麗生邑侯手書一聯贈之云我所思兮雙引鳳君之出矣小驂鸞自然雅合不愧才人之筆。

蔡鴻遵本莆陽人宋忠惠公後裔明末遷吳中自署門聯云家藏東漢傳經字世守西山講學編又云字體琴聲中郎世業茶牋荔譜學士家風。

齊梅麓有女弟子張雲裳囊張麗坡參戎之女也歸湯价人觀察之子才貌雙優事梅麓如父梅麓贈以聯云幾生修到梅花骨一代爭傳柳絮才又一聯云前身來自衆香國佳句朗如羣玉山雲裳屢爲余題畫冊畫卷余亦爲雲裳題其鄧尉探梅玉照並報以聯云清才足敵黃崇嘏生世都疑萼綠華。

徽商以木植生意爲最盛故各省皆別建木商會館大抵皆傍長江大河爲之以便於發運也館中有一聯頗雅切句云桑梓同敬恭伐木歌詩求我友波濤仗忠信涉川占卦利同人。

季時菴廣文恩沛。文筆瀟灑。教授蘇州時。自撰大堂一聯云。掃雪呼僮。莫認今朝點卯。轟雷請客。都知昨日逢丁。凡司鐸者。皆當爲發一笑粲。

孫柳君言其鄉有一縣令王姓。其名寅。姓極貪鄙。有夜題其門一聯者。句云。王好貨。不論金銀銅鐵。寅屬虎。全需雞犬牛羊。見者無不嘖然。

董文恪公未第時。游京師。甚困。偶於薙髮店中書一聯云。相逢盡是彈冠客。此去應無搔首人。一日某親王過而見之。大加歎賞。延之入邸。遂以書畫聞京師。又相傳有一薙髮店。乞聯於狂士者。大書云。磨厲以須。問天下頭顱幾許。及鋒而試。看老夫手段如何。數日間。客皆裹足不前。其店頓閉。

余里居。聞人述王萃華都轉耀辰。客座中自題一聯云。君子之交淡如水。大夫無故不殺羊。初不之信。時余方引疾。不入州府。亦無由與都轉周旋。嗣因奉召復出。都轉餞余於官廨。則此聯實在楹間。詰其命意。笑而不答。

嚴問樵曰。道光初元。江南有嘲舉孝廉方正者。大書於其門云。曾是以爲孝。惡能廉。可欺以其方。奚其正。雖涉輕薄。實工切也。

廣陵有鄭醫者云。居杭州時。嘗由瓶窰入山。三十里許。至一觀。榜云清真殿。供老氏像。門楔有一聯云。靈雲內神仙府。龔嶺山中道者家。不識上四字。見一羽士。年近百齡。詢之云。出句上二字。音沾都。雲厚貌。

下句上二字音吃磬。山多貌。按字典。羸徒罪切。音愁。岫所急切。音接。又音都。磬音異。餘二字亦無考。姑錄之以俟博雅君子。

道光辛卯。歷下城中。新建江南會館落成。鄉人公觴於此。乞戲臺對語於嚴問樵。援筆立書云。東土徵歌。問表海雄風。今樂何如古樂。南宮奏曲。聽過雲高響。雅音原是鄉音。大爲劉眉生方伯所賞。

王楷堂老於曹郎。家計甚窘。宅邊馬棚。門臨大道。自撰一聯懸於門柱云。馬骨峻嶒。喫豆喫麩兼喫草。車聲歷碌。拉人拉馬不拉錢。過而見者無不嘖然。

吳江仲子湘秀才。爲壽板舖春聯云。夢且得官原瑞物。呼之爲壽亦佳名。溫雅可誦。

嚴問樵曰。道光癸未甲申閒。余以會試留都。暇日輒製新曲。付梨園歌之。傾動一時。彼中人多有以師事者。余嘗有句云。偶緣我作逢場戲。竟累人爲舉國狂。紀實也。一日逢余初度。羣優畢集。同人戲以桃李門牆四字書扁爲祝。余笑曰。既有扁。可無對乎。因大書一長聯云。儒爲戲。生且淨丑外副末。呼十門腳色。同拜一堂。重道尊師大排場。看破世情都是戲。學而優。五六工尺上四合。添兩字凡乙。平共成七調。唱余和汝小伎倆。卽論文行已兼優。同人爭賞之。歡讌竟日。後爲長懋亭協揆所糾。何戡雖在。不敢復唱渭城矣。

又曰。余所製紅樓雜劇中有巾緣一折。敍花襲人嫁蔣玉函事。詰旦將登場矣。曲師來請云。場上鋪設新房。尙少一扁對乞書之。余卽書玉軟花嬌四字爲額。對語屢思不屬。正躊躇閒。忽見雛伶二人。翩然而

至者。則其徒也。一名天壽。字眉生。一名仙壽。字月生。卽同習此劇者。意有所觸。卽成一聯云。好兒女天仙雙壽。小團欒眉月生。

昔歲初編聯話時。吾鄉某生。有錄寄其師某明經聯句者。余嫌其詞太俚。未之錄也。茲復有續話之輯。某生知之。復丐人來探。似以前聯爲必應探入者。蓋某明經本一村學究。乾隆末。頗有文名。授徒甚衆。某生尤篤信其說。其表章師門之意。亦甚勤。茲不忍重違其意。姑附於諧語中。俾覽者如見其人。且資談助也。其自題齋室兩聯。一云。架一把茅。不過些些風月。闢半弓地。也成小小軒窗。一云。不成農。不成工。不成商。並不成士。未能琴。未能棋。未能畫。亦未能書。憶余爲諸生時。曾與明經同肄業鼇峯書院。日接其言論風采。又嘗同應經古之試。明經居然冠軍。遂餼於庠。是秋復報舉優行。俛得而復失。一日忽揚言於衆曰。我近於齋室新製一聯云。何以廩。何以優。自問不知所謂也。無愆也。無孽。還須再看將來。諸君以爲何如。旁有爲之擊節稱工者。然匿笑者。亦不知凡幾輩矣。此則某生所未及錄寄者。因並存其語。而特隱其名云。京師有某主事。家中失竊。鳴官控追。後經訊出。乃其家丁從內作弊。有其同鄉好事者。特製一聯贈之云。主事何堪爲事主。人家切莫信家人。

紀文達師府中。屢爲庸醫所誤。恨之次骨。適有爲醫家求題扁者。公立書明遠堂三字與之。或私詰其說。公曰。不行焉。可謂明也已矣。不行焉。可謂遠也已矣。此醫只當祝其不行。便是無量功德耳。或曰。萬一彼

復來求題聯。又將何以應之。公曰：我有撰成五七言兩聯。一係乙轉孟襄陽詩字云。不明才財作借主棄。多故病人疎。一係集唐人詩句云。新鬼煩冤舊鬼哭。他生未卜此生休。

鄭仁圃曰：閩縣義嶼鄉正月燈聯最盛。每以諺語相嘲戲。有戶族某調停某事。衆疑其受私。某力辨其無。適賽神作燈聯。某卽以吾鄉諺語解嘲焉。其聯曰：燭問燈云。靠汝遮光作門面。鼓對鑼曰：虧儂空腹受拳頭。

嚴問樵曰：金德輝工度曲。向會供奉景山。以老病乞退。粗通翰墨。喜從文人遊。一日請於余曰：某老矣。業又賤。他無所願。願從公乞一言。繼柳敬亭蘇崑生後。余感其意。爲書一聯云：我亦戲場人。世味直同雞粟。肋。卿將狎客老。名心還想豹留皮。又曰：邗上徽商某。荒於色。嘗製一床。備極華麗。牀柱上懸一小聯。摘卿須憐我。我憐卿之句。榜諸其門。曰：有能屬者。予千金。或以色。卽是空空。是色對之。立攫其金以去。按此語。不但工切。兼寓箴規之義。千金非倖獲也。又曰：嘗過揚州一妓館。見小室中懸一聯云：雪月梅花三。白。夜。酒。燈。人。面。一。紅。時。歎其天然雋妙。亟詢姓名不得。至今耿耿。又於某處見一集句云：明月自來還自去。暫時相賞莫相違。亦致爲雅切。

吳青士曰：秦淮河房中有一才士集句爲聯云：千種相思向誰說。一生愛好是天然。上句用西廂記。下句用牡丹亭。銖兩恰稱。側艷無比。

塗說云。有項某自署其門聯云。一門三學士。四代五尙書。過客見之。疑近代顯宦中無此姓。意其先世或居是官。因造門而問焉。項對曰。吾家父子三人。並弟子員。各占杭州仁和錢唐一學。且祖若父生前曾舉明經。合四代皆習尙書。故曰一門三學之士。四代有五人習尙書耳。君無讀破句別字也。問者大笑而退。

楹聯二話

卷上

揚州舊聯

隱居通議云。賈似道鎮維揚日。上元張燈。客有摘古句作燈門聯者曰。天下三分明月夜。揚州十里小紅樓。衆稱其切。余嘗以爲此必葑州廖瑩中手筆。唐人詩曰。天下三分明月夜。二分無賴是揚州。又唐人登第詞曰。揚州十里小紅樓。盡捲上珠簾一半。皆本郡事也。

逸老堂柱聯

鈕玉樵觚賸。載茗中吳。磐家雄於貲。博學工書。前明甲申後。絕意進取。學使者張安茂。題其居爲才人節士之廬。順治初。官方山觀察吳興。與之友善。因重修逸老堂。乞其長句一聯。鐫懸堂柱。吳走筆書曰。山川無恙。歎前輩風流何處。見冷煙衰碣。古道斜陽。儘悲涼人物。止剩寒鴉。臺閣重新。問蒼穹。英雄誰是有補天巨手。迴日瑀戈。待整頓乾坤。再來杯酒。詞旣悲壯。書復蔚跂。有怨家潛錄其語。以吳陰蓄異謀。首之帥府。禍幾不測。觀察乘夜撤去此聯。力爲斡旋。費千餘金。事乃已。

卷上

二六一

江陰綵聯

江陰縣志載明宏治八年乙卯科中式十五人。知縣黃傅製綵聯云。入國朝一百廿年。未有此科之盛。總直省九十七學。誰爭吾邑之先。

廬山道院聯

江右胡梅心廣文元鼎告余曰。吾鄉廬山道院勝處。皆被富僧佔爲佛寺。只留正中老君殿一所。爲李道士住持。郡僧尙百計謀逐。賄囑官司判毀。道士幾無以自存。適安溪李文貞公舟過湖口。道士爲公族叔。急奔告求援。公許以到山謁廟。因大書舊聯留山中云。天下名山僧佔多。也須留一二奇峰。供吾道友。世閒好語書說盡。曾記得五千妙諦。出我宗傳。語旣恢奇。書復壯麗。不一日而傳徧九江城中。適各官皆來參謁。公曰。此閒道士吾叔也。供奉此山已久。希君等照拂。於是僧計阻而殿得存。

竹垞先生聯

余在邗江得朱竹垞先生大書隸字一聯云。愛畫入骨髓。吐詞合風騷。筆致奇偉可寶。嚴問樵見之云。此是竹垞先生集句贈程友聲鳴者。見王漁洋帶經堂詩話。

戲樓舊聯

京中慶和園戲樓舊有聯云。大千春色在眉頭。尋徧翠煖珠香。重遊瞻部。五萬鶯花如夢裏。記得丁歌甲。

舞。曾醉崑崙豪情逸致。飄飄若仙。相傳爲乩筆者近之。或以爲吳梅村祭酒所作。

夢中聯兆

吳中蔣古愚學博。琴南觀察之父也。觀察與弟學萃俱成進士。惟長子學文尙困諸生。乾隆甲申元旦。古愚忽夢家中新換廳聯云。長子克家居易俟命。下聯云。二人同心誦詩讀書。款署鍾離子彭錢書。覺而異之。次年乙酉。學文果舉京兆書經房南元。從弟禹邁同榜。以詩經房次題。君子居易以俟命一節。主考則彭芝亭大司馬。及滿洲鍾公名音也。夢兆之奇驗如此。

武聯佳話

提督楊愷儀徵武進士也。康熙間奉召入南書房。與何義門。蔣南沙諸公同校書史館。後出爲兩湖提督。晚年歸老。許登瀛觀察贈一聯云。天祿校書名進士。岳陽持節老將軍。亦武職中佳話也。

滄洲黃鶴樓聯

棗堂節錄云。滄洲之滄酒得名久矣。相傳呂祖來飲於此。城外亦有黃鶴樓。祀呂祖像。樓柱有聯云。黃鶴偶乘滄海月。白雲常帶楚江秋。運用崔顥詩語亦頗自然。相傳是呂祖乩筆。

樽園所錄佳聯

樽園消夏錄載楹帖之佳者。如歸元恭贈某公云。居東海之濱。如南山之壽。汪舟次題山陽學署云。昌黎

起八代之衰。想當年苜蓿齋中。不過尋常博士。文正以天下爲任。問今日齧鹽隊裏。可有此等秀才。有客集杜句題隨園云。中天懸明月。絕代有佳人。蔣伯生書齋自署云。熟讀離騷。便可稱名士。涉獵傳記。不能爲醇儒。郭頻伽自題海棠花研齋云。瓦屋只三間。士龍住東。士衡住西。端溪藏片石。真手不壞。真研不損。皆余前話所未及也。

筠亭所仿舊聯

徐筠亭閒居偶錄云。同年趙米垣。曾誦隱士山居聯云。一二畝瘦田。雨笠烟簑朝起早。兩三間破屋。青燈黃卷夜眠遲。余館東楚張氏書屋。仿其意作一聯云。寄跡此山中。數畝芳田。日看犁雲耕雨。忘機斯世外。三間古屋。時欣弄月吟風。見者謂較之原聯。意境更別。

隨園所錄佳聯

隨園詩話云。對聯之佳者。龍雨蒼見贈云。羲皇以上懷陶令。山水之間樂醉翁。余自題云。讀書已過五千卷。此墨足支三十年。按此亦余前話所未及者。

沭陽縣人瑞聯

相傳王某爲沭陽令時。因公事赴鄉。忽見一家有門對一聯云。一妻十七妾。百子半千孫。心異其語。乃停輿遣人入問其家姓氏。並詢此聯語。必非無因。少頃還報云。其家姓呂氏。世爲鄉農。聯句乃實事。此翁現

在尙可相見。令因降輿入與之接談。年八十餘。精神矍鑠。藹然可親。問其百子五百孫。均在膝前。否翁答曰。五百孫者。中有曾孫玄孫在內也。人丁旣繁。食指愈衆。故家居者少。出外謀食者多。士農工商。四民俱備。念我老。皆不忍遠遊。相距不過二三百里。令復詢。一年中當以何時會集。答曰。會集甚難。此往彼來。斷不能一時並到。如果同時回家。不但屋少難容。卽備一堂餐。已形竭蹶。令曰。我願分廉俸。爲爾作東道主。以□百金相贈。每□百□十千錢。每人約有□百文矣。請卽訂期。將子孫之在外者。悉數喚回。使我一見可乎。翁欣然許之。不數日而子孫畢集。所差者。幼小十餘人耳。乃稟知縣令。請次日來鄉。是晚分二十竈。各具雞黍。祖孫五代。席地而坐。開懷暢飲。至半酣。老翁樂甚。謂諸子孫曰。今日一家團聚。此生恐不能再得。非賢宰之德不至此。宜彼此痛飲。於是撫掌歡呼。一笑而逝。次晨令至。有人迎報。請還輿。令仍登堂行弔。果見兒孫挨擠跪泣。竟不能指數。厚賻而去。此乾隆年閒事。山陽學博雷存齋爲廖菊屏守備述之如此。

城隍廟聯

王凝齋秋燈叢話云。吳縣王某。初任寧夏邑倅。夢本邑城隍謂曰。適奉蘇郡檄。有事須質。當速行。王以路遠辭。神曰。有馬可乘。俄一卒控馬立階下。促王乘之。疾如電。瞬息抵蘇。至城隍廟。見大門懸雕金聯句。光輝奪目。書處世但能無死法。入門猶可望生還。殿上楹柱。又書地獄空留點鬼簿。人心自有上天梯。神謂

曰爾伯沒後爾叔不撫諸孤利其田產爾曾出不平之語其信然乎王以年遠不能記憶對神曰卽事而論曲在誰王曰曲自在叔神曰若然則案定矣悟後差人抵家探問其叔已故卽夜夢之次日也王乃親書聯句送懸廟中

南浦橋聯

浦城縣志潘賜字錫文號容庵永樂二年進士授行人奉使日本假歸故里適南浦橋成作爲楹帖分題橋柱流連往跡憑弔古人其警句云上相名邦百族自知朝北闕眞儒繼統千秋誰復並西山喬木參天半點雲香生大石懸崖籠霧千尋瀑布出高泉阜蓋朱幡遠指羣侯元鶴壠金章紫綬近傳相輔白羊墳仙境微茫安得玉爐丹九轉客途高曠尙懷寶匣鏡重磨綠水橋邊金石足齊交友渡白雲鄉畔山川猶護睦親亭畫角聲中彩帳題詩思夢筆青燈影畔玉壺攜酒想觀瀾古洞聯翩畢嶺舊存仙杵妙清溪浩蕩總章新過客帆多四野無虞詩禮競推長樂里庶民有慶謳歌爭出太平坊書院沉沉綠水半灣連渡口仙樓翼翼白雲一抹護山腰載酒攀花月夜乘舟過水北囊琴採藥霜天被褐過郊陽莪衍名儒霽月遠涵蓮葉渡傳成烈女清風高拂桂林橋橋柱凡八百四十有八懸聯俱徧相傳以爲一夕所作人咸歎其敏捷云

林少穆督部。最工作聯語。余於續話中所採獨多。茲復從友人齋頭錄出若干條。愛莫能舍也。因分別附載於後云。題蘇州呂祖祠。時爲開河祈晴酬謝云。仙蹤曾現宰官身。濟世度人水利農田蒙惠澤。道力能迴元始劫。通靈贊化和風甘雨錫康年。丹徒橫閘金龍大王廟云。南宋游忠門。香火傳來猶似錢塘江上。東吳恬德水。帆檣駛過免經鐵甕城頭。時糧船回空。悉由橫閘遶過府城也。余在蘇州修韓蘄王碑塋。督部繼余爲建饗堂。題聯云。祠廟肅滄浪。更尋來一萬字穹碑。新煥巖阿棖桷。威靈震吳越。還認取七百年華表。遙傳江上旌旗。

武廟戲臺聯

相傳每朝之興。必有尊神爲之護國。前明爲岳忠武。我大清則奉關帝爲護國。二百年來。武功之盛。震疊古今。神亦隨地顯靈。威震華夏。故朝廷尊崇封祀。洋溢寰區。浙中吳山頂廟。爲道光壬寅重建。見有集唐句題戲臺一聯云。聖代止戈資廟略。衆仙同日詠霓裳。武廟隨處皆有。亦隨處皆有戲臺。而楹柱之聯。未有壯麗工切如此者。惜忘卻何人所撰。出語係李羣玉句。對語係李義山句也。

于蓮亭觀察所述廟聯

于蓮亭克襄曰。張桓侯廟有聯云。春雨樓桑無限落花悲。帝子秋風劍閣有人灑淚。弔將軍妙在不卽不離。惜未攷何人所撰。又相傳豫章樵子廟。據土人云。光武避難時。有樵子代死。故立廟祀之。廟中聯云。漢

家樵子亦英雄。漫說雲臺列將。莽世簪纓眞草芥。可憐祿閣書生。子雲眞堪愧死矣。又言淮陰墓。在山右。霍山縣。嶺高十餘里。土人名爲韓侯嶺。嶺上有冢巍然。所葬乃其元也。墓前卽祠。有聯云。生死一知己。存亡兩婦人。頗能隱括淮陰生平。

褚河南祠聯

嚴問樵云。杭之褚塘。有褚河南祠。土人以助聖廟呼之。案公諡文忠。見唐會要。又唐彥卿集。言褚河南之柩。至咸通中。始得蒙恩歸葬陽翟。其時以平徐肆赦。賜其孫八品官。扶護以歸。蓋文忠賜諡。亦在此時。而新舊唐書不載。故後人莫攷。余作楹帖書之。俾易名大典。昭示來茲云。廟食褚塘。大節一生垂史冊。魂歸陽翟。易名千古表文忠。

東甌王廟聯

溫州祠祀。以東甌王廟爲最先。王名騶搖。越王句踐七世孫。與閩王無諸。分理東南濱海地。而雄才大略。殆有過之。嗣與無諸俱爲秦所併。王獨率其民。從衆諸侯滅秦。又從漢滅項籍。至惠帝三年。復封東海王。沒葬甌浦山。國人羣稱爲東甌王。史記封禪書。亦言東甌王。壽至一百六十歲。蓋秦漢之際。一異人也。余初至溫州。卽訪王廟。值郡人庀工修飾。輪奐一新。荷平成者思明德。享粒食者頌思文。王之得茲美報宜矣。願自漢迄今。千有餘年。鮮有歌詠其事者。惟國初朱竹垞先生五排一首云。九牧維揚外。三江霸越餘。

入關從漢約。遵海裂秦墟。豪俊宜如此。艱難氣不除。策功夷項籍。分壤接無諸。萬古開王會。孤城拱帝車。靈旗存髣髴。過客盡欷歔。側想風雲會。乘時草昧初。遠途今日暮。下拜獨躊躇。足以存王之英概。余拜瞻之餘。恍於崔顥在前。不能成句。謹獻一聯云。嘗膽臥薪。早有雄心繩祖武。芟蕪夷項。獨膺奇壽奠王基。

張睢陽廟碑

徐筠亭葵堂節錄云。張睢陽廟。余邑處處皆有之。所見柱聯。切當者殊少。豈王之忠勇。難以名言乎。惟前明進士李春熙一聯云。孤忠百戰江山血。一死千秋天地魂。庶幾盡之。按余過京口日。聞都天廟會甚盛。廟卽祀睢陽。因停櫂兩日。縱觀並入廟瞻仰。至邗上。爲雲臺師述及師言。甲辰年新修廟時。鄉人請製楹聯。因手書付之曰。顏許同名。唐代人倫維氣類。李韓論定。熙朝廟貌屹江淮。當時奸臣曾勸睢陽以天道。公罵曰。不識人倫焉知天道。此人倫二字所本。語頗沉著。且人倫廟貌。皆雙聲字也。

史閣部祠聯

余在揚州拜史閣部祠。同人多請予題楹柱。余因閱嚴問樵一聯。爲之閣筆。按史閣部母。夢文信國而生。閣部見明史本傳。我高宗皇帝亦謂史可法卽比之文天祥。實無不可。故嚴問樵聯云。生有自來文信國。死而後已武鄉侯。自是天造地設語。他有作者。不能出其範圍矣。按祠中舊有聯云。佩鄂國至言。不愛錢。不惜死。與文山比烈。曰取義。曰成仁。又云。梅花下有衣冠葬。席帽時知社稷臣。

睢陽張許二公祠聯

魯山令鄭子研鑿撰睢陽張許二公祠楹聯云。儘孤城四百餘戰。功艱李郭。力障江淮。慟當時妾醢僮烹。列帳啣吻聞鬼哭。同畢命三十六人。祠號協忠。史稱雙廟。問何時鬚張皆裂。登堂凜凜見神威。鄭爲揚州興化人。由魯山令請養親歸。服闋不出。聞其著述甚富云。

牛總管祠聯

鄭子研將去魯山時。建宋牛總管臬祠於泰山宮側。因題楹聯云。小朝廷難與圖功。看戰壘千層。遇毒含冤。知魂魄不忘故土。舊令尹行將歸去。借泰山片壤。題楹志別。願威靈長衛吾民。

何恭惠祠聯

山陰何恭惠公燿。由淮陽監司。洊歷河南巡撫。東河總河。有名臣風概。其身後祠聯云。所謂大臣。行己也。恭養民也。惠厥有成績。荆河惟豫。淮海惟揚。一分切其謚。一隱括其官。可稱傑作。惜忘卻何人所題。

江陰典史祠聯

江陰野史云。有明之季。士林無羞惡之心。居高官。享重名。以蒙面乞憐爲得意。而封疆大帥。無不反戈內向者。獨江陰陳明遇。閻應元。新舊二典史。乃於一城死義。向使守京口者。皆如是。則江南何至拱手獻人乎。時爲之語曰。八十日戴髮效忠。表太祖十七朝人物。六萬人同心死義。存大明三百里江山。今陳閻二

典史祠卽以此爲楹帖。按此聯已見前編而不言陳明遇。

西湖帥公祠聯

西湖平湖秋月之左有帥仙舟師生祠。蓋師撫浙有遺愛。士大夫感不能忘。故立祠以報之。姚亮甫中丞題楹柱云。報國有同心。兩地風波皆夢幻。還鄉傳舊德。千秋涕淚滿湖山。自注云。感舊書懷。緣道光二年與余同遭誣陷也。按仙舟師爲道光閒名巡撫。時京中有輿評云。今天下需才孔急。而有兩好巡撫。一聾一瞽。皆投閒置散。甚爲可惜。一指吾師。一指亮翁也。宜兩人相契之深矣。又按同人中有微議亮翁所撰楹聯語太近樸者。余曾見其贈周刺史檀菴一聯云。望君似歲窮黎隱。與物胥春豈弟懷。以豈弟對窮黎。得不謂之新穎乎。

英濟廟楹聯

温州瑞安門俗呼大南門。出城半里許有英濟廟。俗呼白馬廟。相傳神爲昭明太子。旣無舊碑可考。里人亦無能詳其原委者。廟中有潘宗耀楹帖云。白馬溯光儀。綵仗霓旌。尙振英風。昭肸蠁。黃麋談故事。仁漿義粟。長傳闔澤。濟嗷鴻。跋云。英濟廟神靈最著。里俗相傳。梁昭明太子拯飢來此。時乘白馬。故又稱白馬廟云云。按郡志未載此事。前史亦無可徵證。昭明何以來溫拯飢。事屬茫昧。惟此聯尙非俗筆。因附錄之。

永嘉忠義節孝祠楹聯

永嘉縣學之東偏。舊有忠義節孝祠。嘉慶初。爲颶風所圮。嘉慶末。始重建。朱滄湄觀察文翰。爲碑記其事。又各爲之楹聯。忠義祠云。近聖人之居。容光必照。遵海濱而處。明德惟馨。節孝祠云。兒女盡能之一點熱腸。三分血性。家庭常事耳。察乎天地。通乎神明。皆佳構也。

甘露寺聯

北固山甘露寺。爲古來勝蹟。而殊少佳聯。惟正殿中間聯云。紫極煥璇題。瑞露凝甘露。淨域丹輪開寶相。香巖擁翠俯晴江。款署長白高晉題。又有一聯云。露降何年。蘿徑石門開法界。寺臨無地。海雲江月擁祥輪。款署葉河薩載題。皆乾隆三十九年所作。頗能壯麗稱題。然總不如甘露寺頂上大殿聖製一聯云。地窄天寬。江山雄楚越。漚浮浪卷。棟宇自孫吳。涵蓋一切。足與北固山並壽矣。

建隆寺李公祠龕聯

建隆寺。本後周李招討重進舊宅。宋師入城。招討力不能支。合室自焚。因勅建爲寺。卽以建隆年號爲名。近僧小支。手輯建隆寺志。並欲於寺中西偏。募建李招討祠龕。徵余楹柱之語。余集唐劉兼陸龜蒙詩句。應之云。萬疊雲山供遠恨。一家煙雨是元功。近但雲湖都轉。亦題一聯云。宋史何妨稱叛宋。周親畢竟欲存周。亦有味也。

桃花庵三賢祠聯

揚州名勝以平山堂爲最著。平山堂詩以王荆公一堂高視兩三州一律爲最佳。平山堂楹聯以伊墨卿太守隔江諸山十字爲最壯。余於壬寅夏初來游。曾撰一聯錄在前編。謝椒石同年見而嘲之曰。聯句實佳。然二十二字中用數目字多至七八。非古人所譏卜算子乎。余笑置之。丙午年重至邗上。遊桃花庵。登三賢祠堂。與黃右原比部羅茗香茂才商撰楹聯。右原乃雜舉東坡志林墨莊漫錄避暑錄事爲合擬一聯云。四朶兆金甌。是二千石美談。不因五色書雲。誰識名流皆五馬。萬花停玉局。惟六一堂如舊。若湖三賢謚典。合將祠額署三忠。時羅茗香亦擬一聯云。勝地景芳徽。卅載三賢俱典郡。同龕昭祀典。兩文一獻共稱忠。按韓忠獻之守揚。在慶曆六年。歐陽文忠則在慶曆八年。距蘇文忠之元豐守揚時。恰三十餘年。此前後兩聯俱見典雅。非不學人所能辦。當不讓李蘭卿獨步於前矣。李蘭卿舊聯有謚並稱忠語。故卽其意而衍之。因用前聯署余名。以後聯署恭兒名。懸之壁間。而疏其緣起如此。越日茗香又擬一聯云。楊柳拂隄塍。追溯前徽於宋歷。仁宗兩世。桃花徧祠宇。傳來美謚。至今合文獻三忠。亦佳製也。

南鎮廟聯

南鎮廟坊上書天南第一鎮廟。前匾曰表甸南疆。大殿有南鎮神像。後殿有南鎮夫人像。上首側殿有神像。旁聯曰。姬孔情思說丁物色。卽幻卽真。作千古神聖明良之合。一雙蝴蝶。頃刻邯鄲。何君何牧。狗人世。

窮通得喪之占。下首側殿有二郎神勾元帥像。前有匾曰幻其所真。旁聯曰李母占星驚太白。謝公臥月上西堂。按此是據一斑錄所載。似爲占夢神祠而撰。俟更訪之。

招寶山聯

一斑錄又曰。招寶山大小。可比崑山玉峯而稍高。孤注鎮海城外東北角。江海之交。三面皆水。與東岸對峙。隔海面約一里餘。名蛟門。爲鎮海一邑險要。卽爲寧波一郡外障。拾級而上。至半山有碑曰第一山。有亭懸聯云。仙緣到此無多路。福地原來別有天。登其巔。有小方城。城門上題曰威遠城。旁聯云。踞三江而扼吭。看遠近層巒秀聳。碧浪濛濛。永固浙東之鎖鑰。俯六國以當關。任往來寶藏雲屯。牙檣林立。會同海嶽之共球。入城卽寺門。上題曰寶陀寺。內有大觀樓聯云。天與水無涯。萬舶遠循鰲柱麓。地隨山共盡。十洲環向海陀峯。

普陀山聯

普陀一山。周四十餘里。在大海中。山中地全屬於廟。並無糧賦。無乞丐。亦無婦女居住。其佃種僧田。與開小店生理者。皆不攜妻室。全山廟宇不下數十。而惟佛頂山前寺。後寺。三處爲大廟。前寺有聯云。卽心卽佛。但從彼岸問迷津。渡頭寶筏開時。慈航有路。是色是空。誠向茲山瞻法相。洞口祥雲護處。變化無方。款署葉赫實誠沐手敬題。按此據一斑錄所載。錄中僅載此一聯。此外如紫竹林。法華洞。朝陽洞。佛頂山。

法雨寺梵音洞等處亦必各有佳聯容更訪之。

淨慈寺大殿楹聯

杭州西湖淨慈寺大殿歲久損壞道光庚子烏敬齋中丞籌款重修於乙巳年工竣是年恭逢皇太后七旬聖壽紳商於此寺虔設經壇祝釐時梁楚香中丞撰殿聯云依淨土以印淨心回峯現億萬化身覺悟羣迷成淨果引慈航而宏慈量慧日照三千法界莊嚴重耀證慈緣卽用淨慈二字分疏經言關合聖壽莊雅工切羣相讚誦尤妙在回峯卽雷峯慧日卽寺後峯名本地風光靈妙無比矣。

送子觀音殿聯

杭州天竺山中送子觀音殿有查聲山先生舊聯云天上錫麟兒此是世尊親抱送山中聞梵唄原從靈鷲早飛來近人章次白鱗有一聯云湖山本毓秀之區看桃華開落燕子西東蠢爾未銷情欲障天地有好生之德願嘉門善祥明神祐助螽斯無妬子孫多。

靈衛廟聯

錢塘有朱金祝土穀神祠入於祀典志稱靈衛廟南宋咸淳臨安志有封顯忠侯卽此神也魏滋伯聯云南宋三忠古社粉榆隆報賽西湖半壁大招風雨降神靈。

花神月老聯

西湖有花神月老祠。魏滋伯聯云。廿四風吹開紅萼。悟蜂媒蝶使。總是因緣。香國無邊花有主。一百年繫定赤繩。願穠李夭桃。都成眷屬。情天不老月長圓。麗語柔詞。與題相稱矣。

三清殿聯

吳山元妙觀三清殿聯。亦魏滋伯所撰。句云。廣殿啓通明。高捧五雲香案。層霄仰宗動。來朝羣帝珠璣。此題合作此縹緲之語。所謂言各有常矣。

出海觀音龕聯

接待寺毗盧閣上出海觀音神龕。魏滋伯聯云。香象奉金仙。傑閣凌雲。日麗中天通上界。煙霄竄鐵鳳。華鐘度水。風回大海引慈航。

厲樊榭神龕聯

西溪交蘆菴內有厲樊榭先生鸚鵡神龕聯云。香火因緣。彌勒同龕如是住。溪山幽勝。吟魂此地盍歸來。情文相生。亦此題合作也。

蘇公祠聯

西湖蘇公祠橫翠閣中。有一聯云。圖書香山。風流玉局。荷花世界。楊柳樓臺。閣在白蘇二公祠之間。前對柳堤。俯矚荷花。此聯情景。甚爲穩切。

林處士祠聯

西湖孤山林處士祠。林少穆督部於杭嘉湖道任內曾經修葺。迄今二十餘年。又當重修矣。督部有題祠一聯云。我憶家風負梅鶴。天教居士領湖山。可稱雅切。督部又曾於放鶴亭前補種梅花百十本。手題楹柱云。世無遺草真能隱。山有名花轉不孤。

徐中山王樓聯

金陵莫愁湖上。有勝旗樓。相傳明太祖與徐中山王賭棋於此樓。以湖輸與徐氏。聽其收租。樓中懸中山王畫像一軸。楹有聯云。先世著勳猷。憶當年龍虎風雲。楸枰一局。熙朝隆享祀。忻此日蘋蘩澗沼。湯沐千秋。

潘功甫三聯跋

余與潘功甫舍人曾沂別踰十年矣。今夏在東甌郡齋。忽接其手函。如同晤對。喜不自勝。並承封寄楹聯三副。索余題跋。不遠千里之遙。而汲汲爲此迂緩之事。自非相契有素。斯焉取斯耶。三聯者。一爲蘇州滄浪亭放生碑而作。余宜有辭。一係西谿護生菴聯。一係石梁雨來亭聯。則皆余所未經之地。余爲揮汗一應之。此翰墨良緣。亦楹聯佳話也。滄浪亭放生碑聯云。大德曰生。仁心爲質。字極壯偉。下截款云。長樂梁茵林方伯重修滄浪亭之次年。戊子孟夏廿又七日。吳門諸君子有放生之舉。大會於斯亭。適余過吳。

偶訪潘功甫舍人。因悉其事。舍人出楹帖。書此二語爲紀云。德清蔡之定並識。余加跋云。道光戊子孟夏。潘功甫舍人大會吳中諸君子於滄浪亭。屬余爲放生會碑。顧南雅書之。刻石藏於茲亭。今歲戊申。舍人復摹刻此聯。懸之柱閒。爲放生之券。因記始末於旁。前撫吳使者長樂梁章鉅識。西谿護生菴聯云。須知天地常生育。總要人家善護持。八分書款阮元。無年月。余加跋云。西谿護生菴。爲慕鶴鳴先生令錢塘時所建。道光戊戌。潘功甫舍人重葺。同陳碩甫。趙雪門。項梅侶。邵魚竹。諸君復千金池。放生於此。梅侶爲之記。茲功甫復以儀徵太傅師護生菴柱聯。屬爲旁跋。因紀始末於後。時戊申長夏。長樂梁章鉅識。石梁雨來亭聯云。甘雨時零。亭成志喜。嘉禾善養。歲慶占豐。大楷書款云。道光戊申春仲。芝軒潘世恩。余加跋云。道光戊戌。石梁曇華亭被燬。適潘功甫舍人過此。始議集貲興修。有紀事一絕句云。平章事業江河大。有漏涓涓自不知。七十二蓬參徧了。曇華亭上雨來時。蓋此亭創於南宋賈似道。僧因請易名曰雨來亭。天台山田多旱。名此以志喜也。尊公太傅爲書寄雨來亭柱聯。余因記始末於旁。時戊申長夏。長樂梁章鉅識。按蔡生甫學士書放生碑聯。時在道光戊子之夏。時年已近八十。潘芝軒太傅書雨來亭聯。卽今年春仲所作。則年正八十。阮太傅分書護生菴聯。雖未署名。以字勢度之。亦必在八十前後。三公皆以高年老筆。撐拄寰中。洵與勝區並傳不朽。而功甫所以必索余跋者。殆以余亦年踰七十以外。尙能握管。肩隨諸老之後。是可合爲希世美談也。因並記之。

福州貢院柱聯

道光初。福州新修貢院。各聯多出少穆督部之手。有四聯已入續話。茲更記得一聯云。攀桂天高。憶八百孤寒。到此莫忘修士苦。煎茶地勝。看五千文字。箇中誰是謫仙才。此聯尤爲傑作。

四川今省試院柱聯

錢塘蔡麟洲太守振武。督學四川時。曾手撰全省試院楹帖。付梓成書。其小序云。蜀中試院。歷任皆有楹帖。然率就省署一聯。分布各棚。無專指其地者。惟前學使周石芳前輩於重慶。俞荅琴前輩於敘州。有專聯。酉陽試院落成。吾師吳梅梁少空。亦撰一聯。而全省未備。殊缺憾也。使者不揣固陋。於各棚校士之暇。採取志乘大略。參以管窺。綴成此編。非敢與前人爭能。亦以見此邦山川人物。各有所長。俾生斯地者。聞風興起也。駢征倥傯。琢句未工。弇鄙之譏。知所不免。彙而存之。冀留他年鴻爪云爾。道光丙午仲秋。督學使者浙西蔡振武記。

成都府云。江漢鍾靈。二千年天府廓名都。看大雅扶輪。淵雲嗣響。峨岷擢秀。廿四屬人文。循正軌。詔諸生。鼓篋鄒魯同風。重慶府云。誦左思蜀都賦。江漢炳靈。文物媿西京。郡合有茂才異等。讀王勃益州碑。資渝變俗。儒風被東魯。客休歌下里。巴人保寧府云。秦棧連雲。看砥路同遵。劍閣塵清。不用青天歌蜀道。巴山話雨。喜故人出守。玉堂墨妙。乞將粉本繪嘉陵。時同年徐新齋太史出守巴西提調試事欣而題此

順慶府云。史筆晉稱良。何事陽秋尊魏統。儒林宋有傳。欲將剽銳化資人。敘州府云。到此開三水通流。

激濁揚清。試向岷江分上下。念當日諸戎卽敍。詠仁蹈德。至今夔道被文章。夔州府云。倒峽瀉詞源。執障東川。惟有韓文凌八代。乘槎來使節。每依南斗。莫吟杜句。悵三秋。龍安府云。居廉讓之間。莫教風俗移人。盛名難副。綜歲科而試。敢曰權衡在我。僻地無才。寧遠府云。聲教訖南天。滇海通波。玉斧畫河。嗤往代文章。溯西漢。邛都按部。錦衣諭蜀。豔當年。雅州府云。名蹟問邛峽。爲孝爲忠。與爾輩沈吟出處。邊謠探黎雅。恆風恆雨。願斯文感召和甘。嘉定府云。萬壑秋雲。看挹翠浮藍。露冕風前迎九頂。一江春水。願紆青拖紫。霓裳天際會羣仙。潼川府云。移孝卽爲忠。在昔颺言嘉學士。讀書先識字。莫將干祿笑平原。綏定府云。州升爲府。增二邑於隣。舊治號通川。多士顧名。嚴辨夫聞也。達也。歲兼以科。閱三旬而畢。新知培藝圃。諸生勤業。慎戒乎暴之寒之。眉州云。千載詩書域。坐修竹林中。盡饒佳士。四賢桑梓地。問斜川集後。誰嗣高文。邛州云。地接蓉城。前哲仰遺型。有講學名臣。尙留書院。帖傳竹杖。此邦挺高節。笑尋源使者。不貢人才。瀘州云。雁塢表鴻題。千佛蟬聯。試數涇南文盛。馬山欣驥附。一時驂靳。行看冀北空羣。敘永屬忠州云。桃李種新陰。佳士如林。異日期爲華國選。梓桑懷讜節。前賢在望。諸生莫負大州名。唐陸宣公。吾鄉嘉興人。以疏論裴延齡貶忠州別駕。酉陽州云。絕磴躡天梯。鳥道窮幽。惜此地未來靈運。駕名山留洞府。龍威探祕。問諸生誰是茂先緣。按四川全省二十四屬。除松潘理番兩廳。資綿茂三州。附成都考棚。敘永廳。附瀘州考棚。石碛廳。附忠州考棚外。實按試者。共十七棚。每棚皆係新撰楹帖。典切工雅。足以軼後空。

前時余方輯楹聯三話。與太守相晤於杭州。承以此冊惠讀。因思各直省擁絳帷。持玉尺者。不乏其人。使皆有好事之人。生花之筆。豈不蔚成巨觀。大爲此編生色乎。跂余望之。

無錫縣署楹聯

錫金識小錄云。武公承謨。始赴無錫任。於受篆前一日懸聯。四鄉人皆聚觀。其照壁聯云。罔違道。罔拂民。真正公平。心斯無忤。不容情。不受賄。招搖撞騙。法所必嚴。頭門聯云。視民如傷。錫邑蒼生皆我子。修己以敬。東林前輩是吾師。儀門聯云。工堪比官。斧斤利刃。隨手攜來。因材而用。醫可喻政。硝磺猛劑。有時投下。看病何如。大堂聯云。人人論功名。功有實功。名有實名。存一點掩耳盜鈴之私心。終爲無益。官官稱父母。父必真。父母必真。母做幾件懸羊賣狗的假事。總不相干。時先聲所奪。平日紳衿之出入縣庭者。皆悚息危懼。有避至他省者。又張公燦在任時。有一聯云。陽奉陰違。天有難遮之眼。民窮財盡。地無可剝之皮。語雖粗而特爲警確。又王公喬林任金匱時。嘗有一聯。忘其兩起句。其下句云。半點模糊。已耗民財於暗地。一毫偏陂。卽推赤子入危途。尤臨民者。所不可不知。

廬州郡署楹聯

仁和孫笠帆豫元。官廬州太守。自製大堂一聯云。法堂下。無非士。無非農。無非商賈。敢任性縱情。漫道我。惟行我法。廬州境。也有山。也有水。也有田園。試探風問俗。斯來吾亦愛吾廬。頗爲時所稱。

溫處道署楹聯

溫州分巡道署東偏有園。康熙閒。三韓高公其佩所築。高公本號且園。故卽以爲園名。乾隆閒。三韓徐公綿擴而充之。分爲十景。曰冠綠軒。曰銜遠山亭。曰筠廊。曰藤花徑。曰亦舫。曰養竹山房。曰小春草池。曰蓮勺。曰梅花書屋。曰松化石齋。今惟冠綠軒扁尙存。嘉慶閒。歙縣朱滄湄先生繼任此閒。撰聯云。妙作畫圖看五色。目迷高鐵嶺。恩叨江海住。三年心醉白香山。則聯已無存。惟冠綠軒中尙懸一長聯云。與古相於。緬當年謝草王池。共仰風流獨步。從吾所好。占此地荷亭竹榭。還期心跡雙清。則南豐劉方伯斌所題也。

溫州郡署楹聯

溫州府署。本宋高宗駐蹕之區。規制崇宏。爲兩浙十一府署之冠。惟自外堂以至內廡。無一佳聯留題者。豈以前官斯土者。皆不屑爲此耶。考昔賢守此郡者。以王右軍謝康樂爲最著。故縣中有王謝祠之建。惟此閒山海要區。今昔情形頓異。有未可以王謝之臥理概之者。余以就養來此。令恭兒隱據此意爲之。越日恭兒卽擬句呈云。要地寄一麾。須常念海山深阻。舊堂共千載。敢但希王謝風流。雖亦係常語。而尙質實不浮。因卽令其揭諸堂楹。以諗觀者。

寧波郡署楹聯

寧波府郡署規模宏壯。與蘇州郡署相仿。真海疆名郡也。署中楹聯云。念厥職匪輕。休戚與六邑相關。曰

慎曰清曰勤。敏求斯心可問。是非惟羣言是度。不寬不猛不因循。又一聯云。名郡冠東南。山連奉象。海環鎮定。江抱鄞慈。赫赫巖疆。雄浙水。循聲稽史冊。唐有黃羊。宋稱吳趙。明紹張蔡。巍巍芳躅。想前賢。

河東道署楹聯

山東河東道。專理鹽政。道署面中條山。薰風洞。每歲南風至。則池鹽旺產。署大門有一聯云。薰弦一曲留天地。山色中條閱古今。可稱雅切。

熊氏堂聯

吾師熊謙山尚書公。本南昌舊族。自其祖始遷鉛山。祖卒時。遺五孤皆幼。而家極貧。有諷其祖妣章氏改適者。章誓之曰。吾非不能潔身以殉。顧念五子如椒。豈無一辣者。惟當煢煢撫孤耳。其族衆遂以五椒名其堂。至公以進士出身。官至大司寇。公之子。或由諫垣典郡。或由詞垣開藩。至今門材鼎盛。公嘗承召對詢家世。以務農答。上稱爲耕讀人家。祖塋在河口鎮之衢。有九山環拱。如獅形。堪輿家以爲吉壤。所居在鵝湖山。嚴問樵爲撰堂聯云。獅嶺播椒馨。節生孝。孝生忠。豈獨簪纓誇世胄。鵝湖炊稻熟。子承父。父承祖。但憑耕讀作人家。熊竹村指揮常銑。謙山師之孫也。僑寓邗江。善治房屋。問樵亦爲撰堂聯云。辭家祇爲稻粱謀。憶老屋湖邊。耕讀敢忘祖德。作客劇饒詩酒興。過平山堂下。典型如見鄉賢。

勤教堂聯

張仲甫曰。先倉侍公遺命。以菰城老屋勤教堂。改爲支祠。手撰楹聯云。士勤於讀。農勤於耕。工勤於藝。商賈勤於執業。一事可資生。族少遊閒。便是興隆氣象。祖教其孫。父教其兒。兄教其弟。伯叔教其猶子。百心思式穀。堂瞻名義。勉爲孝友人家。按此聯亦本前人。而以勤教二字強對。工力悉敵。似較通用舊句爲佳。

相府新舊門聯

雲臺師舊宅。在舊城之公道巷。自回祿後。始遷居新城南河下康山草堂之右。余於數年前。初到揚州。卽謁師於舊宅。巷口有石碑樓。大書福壽庭三字。大門口貼八字大聯云。三朝閣老。一代偉人。時觀者多以爲疑。謂師之枚卜。在道光年間。何以有三朝閣老之稱。不知師於乾隆六十年九月。已授內閣學士兼禮部侍郎。則閣老之稱。由來已久。或又疑一代偉人四字。頗嫌自誇。余初亦無以應之。後讀雷塘菴主弟子記。乃知師於嘉慶五年。在浙江巡撫任內。奏陳籌海捕盜等因。會奉有顯親揚名。爲國宣力。成一代偉人之諭。此是敬錄天語。並非自誇也。後吾師亦微聞人言。遂於新宅大門改書云。三朝閣老。九省疆臣。則更不招擬議矣。按王蘭泉先生湖海詩傳中。吾師詩下小傳。有年華正盛。嚮用方殷。加之以開物成務之功。進之以誠意正心之學。洵一代偉人云云。似亦敬本褒嘉之語。而吾師究以爲涉於自炫。故改書之。老臣謙抑之盛心。可以風矣。

節孝總坊聯

陶文毅公撫吳時。勗爲節孝總坊之事。余與賀耦庚方伯。極力襄成之。大江南北。數百十年來。殆無不闡發之幽光矣。揚州節孝祠前總坊。有阮雲臺師撰聯云。稽揚州千百人。合成節孝崇坊。質聖賢以彰風化。逢大清億萬載。恩許春秋典祀。感天地而動鬼神。莊重不佻。與題相稱。時桂丹盟太守超萬。亦有聯云。共話慰窮愁。耐過冰霜逢雨露。相觀勵名節。免教巾幗笑鬚眉。亦情文深至語也。

水倉門聯

揚州城內街巷。多設水倉。以備鬱攸之驚。他處所宜仿行者也。孫春洲爲作門聯云。事有備而無患。門雖設而常關。羅茗香云。此聯原本出句。係井用汲以受福。後始改事有備以無患。余又改爲事前定則不給。近又別擬一聯云。玉瓊何煩裨竈讓。金蓮永免祝融災。

紅船門聯

今大江來往之船。以雲臺師巡撫江西時所製紅船爲最穩。且最速。嘉慶十八九年間。始創爲於滕王閣下。後各處皆仿造。人以爲利。今湖北安徽。以迄大江南北。吾師所製之船。隨在而有。船中小扁。多師所手題。有滄江船。木蘭身。曲江舫。宗舫諸號。數十年來。利濟行人。快如奔馬。開物成務之功偉矣。吾師嘗爲余述在江右時。偶以事遣家丁回揚州。恰值風水順利。朝發南昌。暮抵瓜州。若非紅船。斷不能如此快速也。因製一聯。懸於舟中云。揚子江頭萬里浪。滕王閣下一帆風。

焦山陳恪勤聯

焦山水品菴中有長沙陳恪勤公手書一聯云。山月不隨江水去。天風時送海濤來。跋云。此山中舊聯。不知爲何人所作。今久無存。山僧數爲吟誦。余甚愛之。以屬對不甚工。或亦傳述之譌。因以江月易作山月。流水易爲江水云云。而自然菴中。林少穆尙書亦書此聯。作江月不隨流水去。天風直送海濤來。跋云。此朱文公句。陳恪勤不審所出。易江月爲山月。流水爲江水。又誤以直作時。今重書以正之。按陳恪勤固以意輕改舊句。而少穆亦偶未審也。此宋趙忠定公汝愚。同林擇之。姚宏甫。游吾鄉鼓山詩句。朱子喜之。爲天風海濤四字。大書磨厓於劣巔峯頂後。後人又建天風海濤亭。今亭久圯。而厓字猶存。此句亦長在人口。不知者遂誤以爲朱子詩。今趙詩載鼓山志。厲樊榭宋詩紀事亦錄之。此聯以題鼓山。固佳。今若移題焦山。則情景尤真切。故樂爲辨之。記得水晶菴壁。又有入室果同水晶域。開門正對石公山。一聯殊工雅。忘卻何人所題。石公山卽象山。正與焦山相對也。又記得乙未夏。余游焦山時。借菴詩僧猶健在。前一年。是其八十誕辰。借菴索余補贈聯句。時從遊者已停橈相待。乃手揮十四字與之云。山中鶴壽不知紀。世上詩聲早似雷。句雖未工。而意頗切。借菴稱謝不絕口。而余則久忘之。今此聯尙懸海西菴壁。閱之如同隔世矣。

望湖樓聯

望湖樓以坡公一詩著名。卽論景亦擅一湖之勝。余屢欲題一楹聯而不能成句。魏滋伯廣文一聯甚佳。恐同人皆當閣筆也。句云：三十里湖鏡峯屏。壓笛可無人坐月。廿八字雨珠雲墨。凭闌依舊水如天。滋伯又有藏經閣一聯云：芬誦旃檀。深入華嚴文字海。函尊榆櫺。兼賅菩薩聖賢心。亦工麗可喜。

第一樓聯

陳琴齋廣文偕徐鐵孫司馬過孤山第一樓旁酒肆。見洪稚存先生題篆聯云：第一樓邊浮大白。初三月上盪空青。一老嫗曰：此三十年前酒客留題。司馬卽購得之。今鈎摹懸第一樓中。又第一樓中有錢小謝廷炤題聯云：卽景親風月。隨時篤詩書。蓋集尹宙碑字也。

橫翠閣聯

張仲甫曰：孤山蘇公祠門側。近歲起一閣。適當吳山橫處。汪少海大令取蘇詩內橫翠二字額之。又集句爲聯云：今日重來問鷗鷺。故鄉無此好湖山。對句係蘇詩人所熟知。出句則何巖叟潛齋集中句也。

理安寺聯

余來往西湖踰五十年。熟聞理安之勝。而游蹤迄未能到。今年中秋。始與趙蓉舫學使。固蓮溪將軍。爲看桂花。同涉理安之頂。踰旬餘日。又挈恭兒英兒蕙婦儔孫再往游。前數十年所欲一到而不能者。今兼句而再至其地。不可謂非勝緣。曾賦詩紀之。末聯云：果否真靈關位業。清涼亭畔一盱衡。自注云：相傳覺羅

桂文敏公歙縣曹文正公皆由理安寺僧度世。實未詳其事也。第二游始登松顛閣。讀桂杏農觀察一聯。並跋語。方悉其原由。聯云。薄宦寄明湖。有夢難尋荆樹影。前因迷法雨。招魂空叩木犀禪。跋云。甲戌春。先宮保文敏公。鞠獄粵西。道卒於武昌行館。太傅曹儷。笙師。忽夢兄曰。我與公皆理安寺僧。今當歸矣。愕然而覺。越日。楚督奏函適至。遂以上聞。辛卯。余分巡浙西。攜真菴弟。同詣理安。修篁疊嶂。夢又成空。爰題楹誌。鴿原之感。覺羅桂菖識。並書。按曹文正師騎箕之前數日。相傳亦有夢徵。則真靈位業。殆非虛妄。惜無好事者。合塑二像於閣中。以張其事。使無觀察此聯。則何人更能理其說乎。

見山閣聯

張仲甫舍人。杭州老屋書齋。額曰彞壽東軒。歲久傾圮。近重加葺治。增一樓。樓旁更增一小閣。面西。得見南北兩高峯。及北山一抹。樓牆罅處。並見保俶塔。題曰見山閣。魏滋伯贈一聯。乃汪孟文女史玠所書十字。曰。一塔遠出樹。衆山青到門。汪爲陳扶雅孝廉善佳耦。大小行楷皆工。中年遽殞。此聯乃滋伯收藏舊蹟。恰合此閣之景。滋伯又自書集句一聯云。喜無多屋宇。幸不礙雲山。仲甫皆甚珍之。

辛峯一角樓聯

履園叢話云。長白斌侍郎良。爲前兩江總督玉公德第八子。曾官蘇松糧道。駐劄常熟。署後卽虞山也。有小樓可以望遠。題曰辛峯一角樓。與吳中諸名士讀畫論詩。殆無虛日。自題一聯云。羣彥集東南。有溫李

詩才荃熙繪事。高樓占西北。對石梅香月。辛嶺晴雲。

小礫山莊聯

隨園詩話云。陳豹章有別業在廬江。曰小礫山莊。依山結屋。吟嘯其中。自題聯云。王伯輿終當爲情死。孟東野始以其詩鳴。

江心寺樓聯

江心寺樓上。楹帖甚多。余同年李芝齡尙書一聯。最爲時所傳誦。句云。青山橫郭。白水繞城。孤嶼大江雙塔院。初日芙蓉。晚風楊柳。一樓千古兩詩人。此外朱滄湄觀察亦有句云。長與流芳。一片當年乾淨土。宛然浮玉。千秋此處妙高臺。亦頗超脫。又樓外小柱上。有沈茂才步雲集唐人一聯云。潮平兩岸闊。江上數峯青。亦尙自然。此則聞之孫雨人學博。余兩度登樓。實皆未見此聯也。按芝齡尙書初日晚風八字。是合謝康樂孟襄陽言之。二公皆與孤嶼有關。可稱巧合。而徐鐵孫權守榮一聯云。衆山遙對酒。孤嶼共題詩。則直書孟襄陽之句。且跋云。以實孟樓之名。是爲小峴先生揚其波。殊可不必矣。余前游有詩而無聯。近始補製一聯云。風景不殊。四十餘年舊鴻雪。江山如許。二千里外小金焦。

尺五莊柱聯

京師城南之尺五莊。風景頗似南中。地主爲恆心農太守。亦頗風雅。興化鄭子研有聯贈之云。何處無明

月清風半郭。半村裴綠野。此地有茂林修竹。宜詩宜畫。謝青山主人得之甚喜。

錦屏山亭聯

鄭子研曾任河南令。於錦屏山建亭。題柱一聯云。樹栽棠作舍。山製錦爲屏。蓋宜陽本召伯甘棠舊治。此雖僅十字。而自然工切。即可不磨。

黃鶴樓楹聯

余前錄黃鶴樓楹帖。獨遺卻吾師翁覃溪先生一聯。近讀吾師年譜。急補錄之。吾師於乾隆壬子科。充湖北鄉試正考官。有黃鶴樓圖記云。榜發後重九日。開讌於黃鶴樓。樓前設屏。插菊花數千萬枝。以侑酒。酒罷。題一聯於樓柱曰。千古題詩到崔李。本朝制義在熊劉。余官湖北時。嘗三度登黃鶴樓。而皆未見此聯。豈當時並未鏤板。而墨跡遽爲人所匿耶。使不讀吾師年譜。竟無人知有此聯矣。名流手蹟。其湮沒如此者。蓋不尠哉。

琵琶亭聯

董雲巖題琵琶亭聯云。一彈流水一彈月。半入江風半入雲。張仲甫爲余述之。自然可喜如此。

江心寺門聯

孫雨人學博永嘉聞見錄云。江心寺外門。舊有聯云。雲朝朝。朝朝朝朝朝朝散。潮長長。長長長長長長消。

旁題宋狀元梅溪王十朋書題。余謂此等似巧實拙。斷非梅溪手筆。卽如聯意。亦止須雲朝朝朝散。潮長長消。何煩重疊至八字耶。並引蔡葵圃之言曰。題曰宋狀元。本人斷無此款式。其爲好事者假託無疑。憶四十三年前到寺。亦曾目擊此聯。以其費解。笑置之。旋里後。乃知烏龍江之東山上羅星塔。舊有七字聯。不知何人所撰。其句云。朝朝朝朝朝朝夕。長長長長長消過。客皆不知所謂。相傳康熙中有一道人到此。讀而喜之。衆請其說。道人笑曰。此山爲海潮來往之區。此聯出語。第一第二朝字。上平聲。第三朝字。下平聲。通作潮字。第四朝字。下平聲。第五朝字。上平聲。第六潮字。下平聲。凡此平聲者。皆應作潮字讀。對語第一第二長字。平聲。第三長字。上聲。第四長字。平聲。第五長字。上聲。第六長字。又是上聲。如此讀之。自不煩言而解。不過此言潮汐長消而已。言訖。道人遂不見。或以爲純陽現身也。按此塔聯與寺聯。字句互異。其爲仙筆與否不可知。而塔聯似較簡明有趣。故余曾錄入楹聯續話中。學博言道光壬辰。颶風大作。此聯已吹在江中。不知飄流何處。而余今冬重游。則寺門仍有此聯。卻非舊款。後題章安蔡朝珂重錄。因複記之。

熙春山聯

吾鄉邵武熙春山。爲一邑勝地。邑人龔正謙題聯。頗可喜。遠近稱之。而山名益著。聯云。放開眼界看朝日。纔上夜月正圓。山雨欲來。溪雲初起。洗淨耳根。聽林鳥爭鳴。寺鐘響答。漁謠遠唱。牛笛橫吹。

但雲湖都轉聯句

張仲甫曰：維揚城內保赤堂，收育嬰孩，養而兼教，法良意美，譬幼概令識字讀書，稍長量其資稟，能讀書則讀書，不能則卽改業，就其質性材器，所願學能學者，分別各執一藝，故堂中有課蒙者，有授經者，有教詩文者，有教算法者，有教紡織者，有教九流雜技者，各師與徒，分坐分等，書聲機聲，算子等聲，錯雜相應。但雲湖都轉題聯云：隨地遘艱危，貌是諸孤，更何望長我育我，顧我復我，回天敷惠澤，誰非人子，敢或忘飲之食之，教之誨之。仲甫並言數年前，小住邗城數日，偶過門外，忽忽入堂一觀，僅記此聯，惜未暇考其章程，并未知何年何人所建立也。

丙塘居士輯載數聯

東望望閣隨筆題丙塘居士輯，不著姓名，云四月初八，乃南宋謝太后壽崇節，初九日，乃度宗乾會節，賈似道命黃蛻作牋云：聖母神子，萬壽無疆，復萬壽無疆。昨日今朝，一佛出世，又一佛出世，又題佛寺山門內金剛對聯云：莫怪和尚們這般大樣，請看護法者豈是小人，又題養濟院云：看諸君腦滿腸肥，此日共餐常住飲，想一樣鐘鳴鼎食，生前都是宰官身，可當晨鐘一擊，又云：乾隆五十五年，純廟八旬萬壽，寶少宰東皋先生進楹帖一聯，最合聖意，句云：天數五，地數五，五十五年，五世一堂，共仰一人有慶，春八十，秋八十八，句八月，八方萬國，咸呼萬壽無疆。按予叢話卷二所載彭文勤之聯，與此大同小異，而此所載

似更簡老。所述撰人亦不同。可重錄也。

金沙港聯

金沙港延青水榭。富海帆中丞一聯云。新水漲三篙。繞檻波光平似鏡。好山環四面。開窗嵐翠拱如屏。又張柳泉太守允垂聯云。鏡面湖光。蘇堤一綫橫窗碧。雲端梵唱。竺嶺千盤壓閣青。兩聯皆雅飭可採。

楹聯二話

卷下

賀雲臺師加銜聯

雲臺師以今年丙午鄉試重宴鹿鳴。大吏奏入得優旨。晉加太傅銜。並有三赴鹿鳴之望。榮寵極矣。按吾師本以太子太保原銜。越加七級而至太傅。如斯曠典。前此所未聞也。謹考本朝滿漢大臣生前以太傅加銜者。如金文通之後。洪文襄承疇。范文肅文程。鄂文端爾泰。曹文正振鏞。長文襄齡。不過六人。餘如馬文穆齊。佟端純國維。佟忠勇國綱。奉文勤寬。謝清義陞。楊敏壯捷。顧文端八代。王文恭頊齡。張文端英。朱文端賦。錢文端陳羣。蔡文恭漸。董文恭誥。皆由身後贈太傅銜。其由太子太保越贈太傅者。則惟劉文正統勳一人。若吾師之躬逢其盛。真稽古之殊榮。科名之曠遇。宜邗江士大夫歡欣鼓舞。嘖嘖以爲美談矣。余客居無以爲賀。獻一聯云。異數超七階。帝眷東山謝太傅。嘉賓侂三肄。天留南國魯靈光。但求切不求工也。是年江南副考官黃徵三通副贊湯。爲吾師門下士。由金陵闌中寄聯相賀云。鸞詔親褒。歷相三朝賢太傅。鹿鳴重宴。同年一榜小門生。亦工不足而切有餘也。又山西平定州張石洲。以集杜句賀。

雲臺師重宴鹿鳴。加太傅銜楹帖云。從來謝太傅。祇似魯諸生。師甚賞其巧切。而外人多不以爲工。按杜詩奉觀嚴鄭公廳事岷山沱江畫圖詩末聯云。從來謝太傅。邱壑道難忘。又奉送郭中丞兼太僕卿充隴右節度使詩中一聯云。恥爲齊說客。祇似魯諸生。不稽其出典。不知其渾成也。

鄂文端贈法淵若聯

聯云。除卻詩書何所癖。獨於山水不能廉。可想法公之爲人矣。

孫觀察贈孫頤谷侍御聯

孫淵如先生曰。漢以來傳儒林者。以通經詁守家法。至晉稍衰焉。有王肅起而亂之。至改易制度。故肅者。經學之罪人也。後世祀之黌舍。旋悟而黜之。星衍嘗作六天辨。五廟二祧辨。又擬集焉。昭叔然難。王申鄭之說。爲一編而未竟。得見頤谷先生家語疏證。爲之心折。因爲題柱云。申鄭難。王叔然所學。先羣後紀。北海之交。星衍爲先生年家子也。按今永嘉學博孫兩人同元。爲頤谷侍御哲嗣。余至永嘉。訪學博於學署。先生以墨蹟篆聯。尙懸壁間云。

阮雲臺師贈汪中翰聯

杭州汪小米中翰。遠孫嗜古能文。雲臺師贈以聯云。異書遠購吾妻鏡。好古常攜己子彝。吾妻鏡者。東洋人所撰書名也。

姚中丞贈范今雨聯

姚亮甫中丞贈范今雨對聯云。不少雄謀吞海若。祇憑餘事作詩人。自注云。道光庚子秋。今雨五兄來武林。話舊。出筐中諸作見示。並索余撰楹帖相贈。時濱海有警。相與論議數四。故及之。范蓋負經世才者。故中丞最器重之。

吳茂才贈趙雲松

袁簡齋曰。生面果能開一代。古人原不佔千秋。此余贈趙雲松詩也。作宦不曾逾十載。及身早自定千秋。此雲松見贈詩也。近至揚州書院。見壁上有秀才吳楷集余第一句配趙之第二句作對聯。贈掌教雲松。天然雅切。

林少穆督部贈聯

三兒恭辰。六上公車。依然故我。近緣福州舊宅。不能安居。奉余出遊。並奉捐輸令。因作郡大夫。指省浙江。以便迎養。非得已也。時少穆尙書。由陝西馳書相賀。中有哲嗣以二千石游登通顯。台端以八十翁就養。湖山云云。余謝不敢當。而心豔其語。囑少穆就此演成長聯。將懸挂於武林寓齋。以爲光寵。甫踰月。少穆果手製二十八字長聯見寄。並綴以長跋。詞翰雙美。感愧交并。時方集錄楹聯三話。得此又增一美談。不禁眉飛色舞也。句云。曾從二千石起家。衣鉢新傳賢子弟。難得八十翁就養。湖山舊識老詩人。跋云。蒞林

中丞老前輩大人自出守至開府常往來吳越閒今喆嗣敬叔太守又以一麾莅浙迎養公於西泠公游興仍豪吟情更健此真與湖山重締夙緣矣昨書來索楹帖以則徐前書有二千石八十翁對語囑廣其意爲長聯並欲識其緣起公昔歷封圻距守郡時才一紀耳今懸車數載後復以兒郎作郡就養於六橋三竺閒此福幾生修得若他日再見封圻之歷承此衣鉢之傳豈不更爲盛事敬叔勉乎哉道光丁未人日同里館侍生林則徐識於青門節署時年六十有三少穆由西域賜環後先權陝甘總制旋撫關中綏輯番民筦理捐務公私具舉歡頌載途而不知其三年塞上開墾屯田厥功尤偉以逐臣而猶爲民爲國豈復是尋常報稱之情近雖因病陳情行將感激復出且聞已飭喆嗣鏡帆編修還朝供職其爲心存君國實遠邇所同欽適承公以長聯寄贈余不揣固陋亦勉成數語報之雖不足以揄揚盛美而情往似贈與來如答亦聊紀一時翰墨緣也句云麟閣待勞臣最難西域生還萬頃開荒成偉績鳳池詔令子喜聽東山復起一門濟美報清時

按此聯書就緘寄關中適公已擢移滇黔總制未知得達與否而公所惠寄之聯則早已裝治完美懸諸杭州三橋址新宅中衆目快瞻且諱

炙人口矣

少穆督部本工爲贈答之語得者往往矜爲家寶蓋於稱揚中更能雅切其人非泛泛作諛詞者

也如吳中贈石琢堂前輩云陶鎔梓里三千士領袖蓬山二十科時石掌教蘇州之紫陽書院已十餘年也關中贈楊霽峯中丞名巖云點蒼南去鍾英地太白西來建節天楊以滇人開府陝西也恩縣贈陶訪雲同年銓云河清想見官如水宦久真知縣是恩贈巡捕官吳青士廷榕云久許匡劉成國器肯

將屈宋例銜官。贈張雲巢鹽使云。清門甲第傳兒輩。舊部湖山屬寓公。時卜宅武林。適得次君館選之喜也。送葉小庚申薨之官。雲南富民縣云。人自玉堂來。吏亦稱仙宜不俗。神從金馬見。民能使富莫憂貧。贈王楷堂比部廷紹云。南士淵源承北學。秋曹門館坐春風。比部屢與分校。所得多南省佳士。一時無與爲匹者。

楊時齋制府壽聯

鄭子研有賀楊時齋制府遇春壽聯云。紫氣滿關中。合李聃同期而至。青城臨蜀道。先王旦一日以生。

松湘圃相國壽聯

姚亮甫中丞祝松湘圃相國筭壽聯云。仕宦閱六十年。駸駸未已。馳驅逾十萬里。蹇蹇匪躬。上聯固是雅切。下聯尤非公不足以當之。又有手贈一聯云。三德知仁勇。一官清慎勤。以之頌公。亦無愧色也。

張仲虞郡丞壽聯

湖州張仲虞通守學韶少奉其尊甫前河帥蓮舫公戍邊。嗣奉公命回籍省母。又奉母命出關侍父。未幾公終於戍所。復扶輿入關。計奔走十年餘。所歷不下十萬里。中外皆以孝子稱之。繪有凌山策騎。龍沙罔極兩畫卷。自爲之記。復廣徵名流題詠殆遍。近來筮仕南河時。同懷兄雨琴大令學襄亦官儀徵。母太夫人年已七十餘。猶健勝。每往來就養。同人以爲美談。值仲虞四十初度。嚴問樵撰聯美之云。歷沙磧兩度。

凌山有志竟成。父子各完忠孝節。奉板輿一條淮水。曰強而仕。弟兄同現宰官身。

雲臺師壽聯

嘆夷之不犯揚州。京師士大夫。以雲臺閣老之居邗江。比漢鄭康成之居高密。而以嘆夷比黃巾之保鄭公鄉也。踰年值八十壽辰。恭蒙賜壽。彭春農學士。以楹聯寄賀云。新恩又見臨裴野。近事爭傳保鄭鄉。即指此事。

但都轉壽聯

嘆夷初犯京江。揚郡人家。已紛紛逃竄。賴但雲湖都轉。竭力防堵。加意撫循。不一月。即各安其居。揚人甚德之。值都轉九月誕辰。各製楹帖。以致其頌禱之忱。然語或過當。甚有以郭汾陽李西平爲比者。則擬不於倫矣。惟雲臺師撰七字聯云。菊花潭裏人同壽。揚子江頭海不波。落落大方。恰如身分。不能不推爲大手筆也。

劉恭人壽聯

雲臺師有老妾劉恭人。卽嫡配江夫人之媵也。師兩次斷絃。得其內助力爲多。生子祐。登道光癸卯鄉薦。現官刑部山西司郎中。劉得四品恭人封典。女適吳刺史公謹。崧圍閣老子婦也。今歲七十壽辰。師許同人爲之製錦稱觴。余亦製一聯往祝云。鹿宴沐恩濃。正及臣門膺曠典。翟衣襄政久。更看子舍策清名。翼

日師親來謝步。並曰：此番同人所贈聯軸頗多，惟閣下及右原所贈句最佳。右原句云：溫溫恭人，母以子貴。潭潭相府，日引春長。先是右原以酒筵獻吾師，以手簡謝云：此席恰爲煖壽而來，煖者溫也。所謂溫溫恭人是矣。右原卽因此製成聯句，莊重渾成，真可入余聯話也。

雲臺師贈聯

余因覲入京，旋卽拜巡撫廣西之命。雲臺師以分書十四字賜之云：江鄉仁惠傳荒政，嶺表恩威播外夷。余曰：粵西接壤交趾，撫御爲難，余方不知所措，吾師何以預獎之如此？抑以頌爲規，正所以進之歟？師曰：以吾子當此任，我必其勝任愉快也。而上聯則實我由中之言，亦衆口如一者也。

姚亮甫中丞所撰輓聯

姚亮甫先生好作楹聯，尤工爲輓對，能曲折盡意，各肖其爲人。余前錄其輓張蘭渚師一聯，載入續話中，而張仲甫家中實未奉到。後閱余續話，始知之。今年小住武林，與仲甫晤談及此，仲甫始從其後人索得一稿，皆亮翁所手錄。前聯卽在其中，而前所寄聯尙不知浮沉於何人之手。然則余之編輯此書，亦不爲無裨於人也。亮翁在樞直最久，與程春廬爲至交，春廬由奉天少京兆請假歸，沒於京師旅邸，亮翁爲之經理其喪，甚周至。輓聯云：感舊琴亡，一慟空餘呼子敬；酬知劍在，九原何處覓徐公。語雖平近，而情極有餘。滿洲景勤圃中丞敏，亦樞直老輩，與亮翁最稱莫逆，終於黔中撫任，亮翁寄輓之云：二十年禁苑聯

鑣感交合苔岑。長懷古處。七千里巖疆秉節。歎身騎箕尾。未竟嘉猷。鮑雙五先生桂星。與亮翁同年至好。其卒也。亮翁輓聯云。雲路仰鴻儀。不少丹忱懸日月。烟霄驚鶴化。空留奇氣鬱詩篇。此恰肖先生之為人。足以傳先生矣。錢裴山中丞之卒。其太夫人尙在堂。亮翁輓聯云。譽望始簪毫。歷廿年金馬蜚聲。果見鴻猷傾海內。恩勤歸畫荻。痛一夕慈烏失哺。長留遺恨徹泉臺。輓蔣礪堂節相云。黃閣仰殊勳。使相聲名傾遠近。青雲叨夙契。故交情誼黯平生。稿本中自注云。語有微詞。蓋惜其末路之顛躓也。輓潘小坡郡丞云。偉績盛河渠。報國眞資舟楫任。貽謀煥堂構。承家都具棟梁才。郡丞從公淮浦最久。歷年河員之後人。鮮登科甲者。今長公紅椽方伯。次公梧亭觀察。皆由進士出身。河上人豔稱之。輓汪竺君樞部。鳴爵云。溫室盛才名。五夜星辰輝彩筆。玉樓驚早世。一江風雪慘銘旌。輓錢次軒觀察。棧云。宿望冠蓬瀛。八表看花傳洛社。遺型式桑梓。千秋騎鶴歎蕪城。觀察歿於揚州。故云。輓錢古槎觀察。廷熊云。華國挾高才。丹禁百篇餘制草。宣風痛邊徼。素車千里愧生芻。古槎卽次軒之喆嗣。由樞曹觀察蘭州。甫一年而逝。在次軒之前兩年也。輓陳香谷中丞。桂生云。節鉞盛才名。廿載鄉邦遺老。一衣冠淒畫像。百年人望達尊三。輓宋湘帆方伯。其沅云。柏署仰寅恭。允矣直聲聞殿陛。梓邦資保障。凜然生氣壯河山。時暎夷正犯浙東。湘帆行巡撫事。承烏敬齋之後。以勞卒於官。亮翁輓額云。匪躬盡瘁。亦紀實也。輓陸森如太守。楷云。宦海靖波瀾。同荷生成歸大造。寒江空涕泗。難申契闊向重泉。暎夷初就撫也。輓朱雲麓觀

察鴻云。光霽德輝承京邸。從容懷古處。斗山人望失。寢門悲涕感師資。雲麓爲余老同年。品學兼優而時流多迂之。得亮翁此詞。推崇之至。雲麓可不死矣。輓楊梅梁中丞母田太夫人云。錫命荷三朝。翟菲夫榮。節旄子貴。陳情纔隔歲。煙霄鶴化。風樹烏啼。太夫人卽忠武公之夫人。忠武甫乞歸。偕夫人銜恩旋里。不逾歲而夫妻雙逝矣。輓朱詠齋尙書云。報國勵丹忱。睿睿公忠聞海內。生天還絳闕。堂堂正氣在台垣。頗肖詠齋之生平。寄題三子婦錢孺人繡帷云。宗黨仰賢名。歎畢生辛苦持家。無愧相夫教子。關河悽老淚。論初地慈祥證果。定知成佛昇天。輓徐小巖孫壻云。噩夢忽驚魂。痛絕高堂環視孤。煢煢還待撫。微疴真霧露。傷哉旅邸。是何醫藥漫相攻。小巖爲訪巖方伯之冢嗣。卒於客邸。蓋爲庸醫所誤耳。輓方葆巖制軍母吳太夫人云。錫命兩朝隆。曰順曰慈。內壺行堪符史筆。陳情三載允。惟忠惟孝。倚廬哀莫忘。王言順慈爲封誥。中玉音。忠孝則允。陳情時諭旨也。輓孫季圃閣老元配張夫人云。八座晉崇封。業煥綸扉資內助。三遷垂懿則。經傳紗帳溯遺型。時其詰嗣。篋谷侍御善寶。苻卿太史瑞珍。皆國器也。輓鮑太守步蟬云。廉善廉能。山左早聞循績著。成忠成孝。楚南終古令名揚。太守爲樹堂副憲。勳茂第二子。曾官山左楚南。所莅皆有循聲云。輓錢竹西太守清履云。竹馬共嬉娛。六十年燈火揚州。長憶兒童笑語。銅符宣化澤。廿八載棠陰漢上。試聽父老謳歌。竹西爲余甲寅同年。又同官楚北。其沒也。余亦有聯輓之。今不復能舉其詞矣。輓鮑樹堂副憲云。獻賦共簪毫。紫禁追陪。萬事都曾咨伯始。酬知空掛劍。蕪城憑

眺九原何處覓徐君。輓景福泉方伯謙云。屏翰重周原。黍膏棠甘留政績。衣冠尊洛社。梅消石瘦見丰神。方伯素工六法。尤擅長爲水墨梅石也。輓徐晴圃中丞斫云。瑣闥憶肩隨。宦跡東西投老剛。欣聯舊雨。黃壚驚腹痛。朋歡零落愴懷何處數晨星。

林少穆督部所作輓聯

少穆督部工作輓聯。余於前話中所載已夥。茲復有所得。因復錄之。輓吳槐江督部云。楚粵盛助猷。更饒廿載山林重。廣鳴鹿。皖吳尊齒德。何意三春風雨。遽痛驂鸞。輓吳玉松太守云。加數年。公卽百齡才筆依然。胡不整遺嗟一老。傳三世。孫纔五尺。書香長在。好教一髮引千鈞。輓朱虛舟撫部云。生爲西土福星。卻許湖山娛晚景。沒與東坡同日。應與仙佛締前緣。輓熊聲谷方伯常鐸云。清祕昔忘形。况經兩地同舟。逾艾年華頻話舊。旬宣今盡瘁。空說五絲續命。懸蒲時節正傷神。自注。方伯與余爲清祕堂舊侶。以庚子端午日終於粵東也。輓王紫瀾廉訪瑞徵云。恩命方新。悵籍甚聲華。身後遷除空撒手。官逋未了。歎蕭然環堵。庭前俯仰劇傷心。廉訪於沒後。始奉擢臬貴州之命也。輓屠琴隴太守云。病榻恩來。歎息膏肓難再起。潛園人去。流傳詩畫定千秋。時病中已受九江守也。輓陸萊藏郡丞我嵩云。澤被十閩。深溯頻年砥節奉公。薦鷲名留金筴重。靈歸三泖。遠悵暑月殫精校士。驂鸞人赴玉樓寒。輓江清渠學博有本云。澹泊任天真。憶掉頭苜蓿闌干。八十翁自耕鐵硯。老成悲電謝。試屈指粉榆甲第。廿三科誰共

瓊林。輓麟見亭河帥母惲太夫人云。紗幔仰傳經。八座起居。彤管頻題香茗集。板輿隆養志。三春報答。碧幢忽廢蓼莪篇。惲曾選閨秀。正始集梓行。且歷任皆就養也。輓周稚圭中丞母陳太夫人云。五省奉安輿。一品封崇。况見孫曾縣甲第。卅年隆祿養。百齡算近。忽悲仙佛渺靡幢。輓顧杏樓比部母蔣太恭人云。晝錦迂潘輿。忽感鄰舂驚罷社。春暉違宋幔。恰當佛誕證生天。時比部回籍迎奉。而恭人適於二月十九日。在籍棄養。是日爲社日。輓江芝亭司馬室顏宜人云。燁管擅清詞。紅藥階前。曾伴郎君吟彩筆。繩床驚噩夢。綠莎廳上。忍教司馬濕青衫。顏有詩草。已梓行也。輓吳巢松太史室盛恭人云。荻閣含飴。正喜有孫傳祖祝。蘭陵返櫂。遽隨佛母渺仙幢。恭人無子有孫。適遭其母盛太恭人之喪。赴常州哭奠。歸蘇卽逝也。

盧學士輓聯

盧抱經學士。終於常州之龍城書院。有輓聯云。當代經師。鄭東海。馬扶風。抗前賢爲伍。此閒旅殯。荀蘭陵。蘇玉局。得夫子而三。對仗精切。惜不知何人所作。

朱侍郎輓聯

朱虹舫侍郎方增。平生體氣清羸。而好服大黃。後染寒疾。亦日日服之。以至不起。沒後逾月。生遺腹一子。彭春農學士以聯輓之云。上蒼有靈。遺腹定應昌厥後。大黃爲厲。回頭始悔自知醫。

玉文恭師輓聯

玉研農師由伊犁將軍內召甫入關薨於旅次九重震悼勅繪像紫光閣飾終之典備極哀榮嚴問樵撰一輓聯云百部風清攬銅柱高標定有英魂棲大樹九重雨泣痛玉關乍入不留生面畫凌煙

俞都轉輓聯

閒與兩淮齟齬談歷任都轉之賢以李秬軒爲第一鄒公眉觀察曰秬軒之清標亮節誠不可階然有守而兼有爲者終推平羅俞陶泉德淵一人而已憶陶文毅公整理淮齟之始都轉屢不得其人手書令予切實舉薦余卽以陶泉應蓋陶泉令長洲守蘇州實心實政皆予所目擊心儀者也時陶泉方守金陵聞信力辭文毅以余手書示之陶泉語塞聞陶泉初到揚時運庫並無餘積次年遂有三百萬之儲此席擁東南財賦之雄冠蓋往來每多舛望謗議叢興自陶泉蒞任後改絃更張洗手奉職而裒多益寡稱物平施亦無不各得分願者惜其用心太苦精力驟衰位不稱才年不副德論者傷之余在蘭州藩署忽接陶泉之訃爲之涕如綆靡適其孤以急信懇余轉遞平羅余手揮一聯寄輓之云殫心力以報所知一代長才出甘隴處脂膏而不自潤千秋遺愛滿邗江素聞賀耦庚督部言陶泉無所不知無所不能不謂邊陲乃有此人物又若陶泉若長筦淮齟可稱得人惜地方上少一好手耳此聯正隱括其意今年在揚州聞公眉觀察亦有一聯云敬以持己恕以接物一息尙存此志不容少懈生不交利死不屬子九京可作舍

公其誰與歸。出語本朱子。對語本檀弓。則真足以傳陶泉矣。

胡學士輓聯

胡書農學士敬。乙丑會元。詞林老宿。略司文枋。卽投劾歸來。久主西湖講席。士論翕然。今其子弟皆聯翩。科甲克嗣家風。蔚成武林巨族矣。魏滋伯廣文輓聯云。三百輩杏林弁冕。三萬籤芸署編摩。衡鑒識冰心。文苑有人同涕泪。廿一科東觀楷模。廿二載西湖師表。簪纓聯寶樹。新宮無憾作神仙。組織工麗。無一贅語。足以傳學士矣。今西湖講席。卽其詰嗣工部公接充。亦佳話也。又高伯蓀孝廉學元亦撰一聯云。京兆衡才。由豫而皖。而鄉邦濟濟擢英賢。門下迭爲多士冠。承明珥筆。有史與文典冊。莪莪揜羣雅。浙中欲得替人難。

百文敏輓聯

張蘭渚師輓百文敏公齡云。五等列崇班。勳爵亞桓信。躬穀三營。鍾閒氣。威名留楚粵。江淮出句切。其男爵對句謂公生於張三營也。可稱確切不移。按我朝無五等之封。祇有公侯伯三名。與古相合。精奇尼哈番卽子爵。阿思哈尼哈番卽男爵。合之卽古之五等也。

戴簡恪輓聯

程春海侍郎輓戴簡恪公敦元云。貴爲尙書。儉若寒士。敷歷四十年。其趨公忘寢食。忠矣。幼稱神童。老推

名宿橫覽八千卷。獨精筭通天偉哉。此聯簡而賅。真而樸。非春海不能作此語。非簡恪亦不足以當之。

曹文正師輓聯

英煦齋師輓曹文正師云。從先大夫於九原。五典春闈。首證當年衣鉢。考中書令者廿載。三朝元老。遂成曠代哀榮。蓋文正出德文莊公門下。故出聯言之親切也。

姚亮甫中丞輓聯

翁二銘學士心存。輓姚亮甫中丞云。烏臺執憲。龍節宣風。百城解綬。避威稜。正色讜言。婦孺亦知包孝肅。燕翼多謀。鳳池繩武。十載抽簪。娛晚景。清心學道。耆英羣仰富文忠。又杭城同人公輓云。執法總朝綱。溯當年節鉞宣猷。聲望比富歐韓范。歸田娛暮景。看後起芝蘭挺秀。科名媲美轍郊祁。又張仲甫輓聯云。臣謨望重范韓。有孝有德有守有爲。朝野共欽嚴正性。父執交深管鮑。同榜同庚同官同社。後先並失老成型。自注云。公與先倉侍同甲辰應召試榜。同壬午歲生。同官中外。居又同里。又按公每假旋。必廬墓歸田後。亦廬墓廬墓之日爲多。而世鮮有稱其孝者。故特表出之。

許封翁輓聯

張仲甫有輓許修門封翁聯云。五十年父執深交。申以盟誓。重以婚姻。憶歲在庚寅。猶扶疾哭吾翁館舍。三四代家聲濟美。子爲詞臣。孫爲貢士。數榜開甲乙。曾及身見兩世科名。

張仲甫哭子聯

仲甫有哭其長子某聯云。嗟吾多病愛閒。何堪垂老零丁。又折此剛強一臂。念爾母衰婦弱。未得抱孫慰藉。忍聽他慘戚雙啼。可謂一字一淚矣。

汪少海邑侯輓聯

汪少海仲洋。以詩人爲循吏。而所遇多窮。在錢塘任內。緣事奪職。鬱鬱不得志。從軍甬東。艱難始復一官。又回避至江蘇。已老病矣。遽沒於吳門。同人輓聯。多可傳者。如云。通才百里難留。纔別杭州。鷺嶺魂依詩是識。宦迹一生早定。終歸吳會。鯨圖神授。夢何靈。蓋少海留別杭州詩末章有云。劇愛飛來峯。魂魄飛不去。又聞少海大挑前。一夕夢神授以海圖。莅浙後。首捧檄至海鹽。治海塘。又調錢塘。奪官後。又以甬東軍功復職。至姑蘇。又以前在濱海軍功著績。責其防海。終其身不離海疆也。又一聯云。與子瞻生同里。官同方吏治。詩材稱伯仲。伴和靖寓相鄰。殯相近。湖波山色樂神仙。又一聯云。文章驚海內。詩酒滿天涯。二十年湖上勾留。身去名存。除却歐蘇無此福。薄宦感焦桐。佳人悲錦瑟。七千里蜀中。悵望才豐命。嗇劇憐。李杜亦終窮。皆才人之筆。惜不得撰者主名。少海有姬人某。得於秦淮。色藝無雙。先逝。故佳人句云然。少海從軍甬東。未補官而得藍翎。有書三年奔走。空皮骨。萬古雲霄一羽毛。爲楹帖贈之者。殊爲工切。較劉金門先生自道之語爲佳。劉語已見續話。

林少穆督部室鄭夫人輓聯

林少穆督部之元配鄭夫人。卒於雲南官署。夫人一生福壽兼全。惟中年以後。卽爲疾疢所纏。然由甘隴移滇南。猶閒關萬里也。余未得其訃音。乃預製一聯寄少穆。憶余失偶時。曾以先室行狀寄少穆。少穆卽隱括狀中語。撰一長聯相寄。今余未得讀夫人行狀。道遠不能相待。乃以意質實言之云。相夫歷八州督。教子擅八磚才。誰知八座起居。病與一生相伴住。老屋憶文筆坊。新居望文藻宅。都是文星照耀。魂兮萬里定歸來。

梁楚香母李太夫人輓聯

浙江撫部梁楚香寶常。官庶常。於余爲同館。令山左。於余爲同官。而恭兒觀政之江。又託其宇下。其太夫人壽登八十有七。迎養在署。前歲承九重賜壽。有節署承歡之扁。備極寵榮。今歲撫部亦年登周甲。僚好各製錦稱觴。時余就養東甌。寄祝一聯云。東省憶同官。旋聽臺萊頌南國。北堂依壽母。長看旗翼照西湖。觀者稱其典重。撫部之壽辰。在六月十七。而太夫人於前一日。以微疾棄養。余復寄輓一聯云。錫命兼錫壽。從天節署普慶承歡。喜堂北蕙榮。周甲剛娛萊子舞。同宗復同官。自昔弱息。又叨慈蔭。悵甌東萍繫。生芻遙奠頌封羹。

張仲甫代杭州紳士公輓梁楚香太夫人聯

錫齡膺異數。殊恩憶昨歲。蜨旌捧詔還。轅節省臚歡。傳盛事。詒穀播清芬。宏澤念吾鄉。鯨浦歌豐擊。壤蒙麻有白。頌徽音。

羅茗香所作輓聯

甘泉趙蓮淑茂才。於本年七月作古。茂才年甫強仕。上有八十七歲之所後母。下有少妾弱女。祚薄無承。祧之子茗香輓以聯云。慟生不逢辰。母在堂。妾在帷。弱女在閨。更嗣續猶虛。劇憐朝露先零。定卜此時難瞑目。嘆我無知己。家多故。身多病。命途多舛。信友朋最篤。豈料晨星又落。相期後至共論心。時茗香方遭母喪。繼又殤孫。雖乍離苦塊。而愁病交加。憤不欲生。故末及之。江蘇張鑄臺孝廉。以道光辛巳恩科舉人大挑二等。不能補缺。並不能委署。致盼一首菴盤而不可得。茗香輓以聯云。命也何如。無祿竟難沾薄祿。天乎欲問。廣文可許作修文。張松崖郡丞丁內艱。其太夫人厲氏。既爲茗香之妻嫂。又爲茗香姨母之女。茗香輓以聯云。羨姊三遷訓子。四行劬夫。計平生婦職無虧。仇氏班姬堪並擬。慟我十年炊臼。九月廢莪。想此後泉臺有伴。小姑從母定相親。又代叔公輓姪媳一聯云。七族盡同聲。讚從舅從姑。相吾家賢阮。一朝成永逝。對此日佳兒佳婦。憶衛國莊姜。

袁簡齋輓蔣愚谷

隨園詩話云。洞庭山人蔣愚谷。喜吟詩。致貧其家。以療疾亡。余輓之以聯云。生爲誰忙。學業未成家已破。

死虧君忍。高堂垂老子初啼。

袁簡齋輓徐爽亭

隨園詩話又云。江寧徐爽亭。善小兒醫。能詩。年九十餘。有句云。船底水鳴風力大。蘆中雁語月光高。簡齋有小女病危。爽亭活之。因來往甚歡。其卒也。輓以聯云。過九秩以考終。從古名醫都登上壽。痛三號而未已。傷吾老友更失詩人。

庶母庶妻輓聯

近人有爲庶母三年服者。製一輓聯云。慈母如母。貴父之命也。顧我復我。育子之憫斯。以經對經。莊重而工切。又聞舊一貴官。以媵婢爲妾。生一子。子亦貴顯。其正妻沒後數年。妾始卒。見諸親友輓句。多不愜意。自作一聯云。媵隨妻來。轉令我思妹子。母以子貴。居然婢作夫人。頗爲情文交至。而此聯尤難著語也。按我思妹子。是李后主祭周后文中語。見馬令南唐書。

梁山舟先生集句

梁山舟先生贈人楹帖。聞皆隨手集句爲之。如送陳蘭隣作宰云。神仙官職雙鳧鳥。才子文章五鳳樓。又贈廬陵宰云。百里棠陰鄰畫舫。一江峯影落琴牀。又贈姜少司寇云。君家舊事傳青史。公望中朝仰白雲。又送某副憲使閩粵云。手搴海國珊瑚樹。節擁天星赤繡衣。又送粵東某官假回云。煙雲得路駒千里。炎

海收身鶴九臯。又贈湖州某廣文云。門前問字烏程酒。春暮吟風碧浪湖。又贈某糧道云。經濟只今劉計相。詞華自昔謝中書。又贈某星使本省讞獄云。玉節承天南斗靜。繡衣行晝使星明。又贈某山長云。文章東觀仙曹舊。杖履南湖講席尊。又送某司馬之任云。麾符地喜鄰臣地。姓氏天教上御屏。又贈某學使云。南國人才歸玉尺。中朝門望重冰壺。又贈某將軍云。龍門世澤常華盛。鯨海威名草木知。以上皆張仲甫所錄示。

張蘭渚師集句

張仲甫所居堂中有林少穆督部手書一聯云。應視國事如家事。能盡人心卽佛心。跋云。一西老夫子大人。撫閩中座右懸此對語。則徐昕夕隨侍。知夫子立心行事。皆實踐斯言之義。茲命書楹帖。卽錄此二語。誌銘佩之忱云。按余在蘭渚師幕中。却未獲觀此聯。師又號一西。亦余所未聞。仲甫曰。此先倉侍公所自集楹帖。上句乃仁廟面諭之語。下句則嘉慶丙寅年所奉卮詞也。按余有奉懷吾師句云。儒無名士氣。佛是老臣心。刻入師友集中。仲甫見之。以爲穩切之至。亦可作楹帖也。蘭渚師又喜集古語爲楹帖。如云。爲仁猶曰行仁。服膺弗失。於止知其所止。常目在之。又云。自新新民。止於至善。先覺覺後。求其放心。又集五經句。壽蔣礪堂閣老云。壽考不忘。以頌申伯。德音是茂。有若泰巔。蓋每句皆備平上去入四聲。因難見巧。張仲甫曰。先倉侍公所集四聲皆備聯句。不止一聯。今所記憶僅此耳。又張仲甫嘗述其祖蓮海公。

有集句楹帖。留示孫曹云。聰聽祖考彝訓。深知稼穡艱難。又蘭渚師曾。手集經語。命章鉅以漢隸作楹聯。懸於廳事。以自警。句云。戒之在色。戒之在鬪。戒之在得。職思其居。職思其內。職思其憂。章鉅書竟。乘閒請曰。三戒中。惟在鬪二字。似與我輩身分不甚親切。師曰。鬪之一字。不必定指血氣之勇也。我輩既入名場。大凡奔競之心。傾軋之途。皆鬪象也。足下此時屏居州里。自然心平氣和。將來一登宦途。切須戒之。而使酒罵座。猶其小焉者矣。余謹識之。

陳方伯集句

陳蓮史方伯有集句五七言楹帖。嘗手錄一副本贈余。其爲余書楹帖亦多用集句。道光己亥庚子閒。余次子丁辰。三子恭辰。均隨侍桂林節署。值方伯在里中養疴。兩兒最承其青眼。屢以書畫往復質證。方伯手集聯語贈之云。虛其心。實其腹。驥之子。鳳之雛。義兼褒勗。余及兒輩甚感佩之。

羅茗香集句

羅茗香最善集句。嘗有賀人完姻集句聯三副。其一云。聞鳳窺丹穴。顏延年乘鴻駕紫煙。郭景純其二云。鳳鳥于飛。賓親以禮。太元經金玉爲寶。婚悅宜家。易林其三則專指十月吉期者。句云。十月維陽。嘉耦曰配。三星在

戶。吉事有祥。

嚴問樵集句

上海育嬰堂門柱有集四書聯句者不甚佳。嚴問樵易之云：非要譽，非內交。此謂民父母，無伐善，無施勞。以保我子孫。亦集四書語，較爲工穩。又製天后宮聯云：受天地之中以生。一曰水有功德于民，則祀謂之神。亦頗渾成。問樵又云：今人門帖多有取平爲福，居之安作對者。下句出孟子，人人知之。上句出莊子盜蹠篇云：平爲福，有餘爲害，物莫不然，而財其甚者也。今習爲口頭語，而不知所出。

張仲甫集句

仲甫喜爲集句楹帖，嘗手鈔一本見示，自言與少穆先生所集彙鈔一册，今不能分辨某聯實出何手也。

如云：舉盃邀明月，焚香看道書。太白 讀書破萬卷，落筆超羣英。少陵 百歲真過客，一身爲輕舟。東坡

忘身學草木，委懷在琴書。陶靖節 江山助磅礴，烟月資清真。陸虛 朗抱開曉月，高情屬天雲。東野

樂康 一生如土梗，萬事皆波瀾。陶靖節 自有琴書增道氣，只將詩句答年華。孔平仲 子固精神老坡

氣。茶山衣鉢放翁詩。惠洪 千古風流有詩在，一生懷抱與山開。山谷 閒看秋水心無事，久住西湖夢

亦佳。皇甫冉 方丈蓬萊多伴侶，木公金母相東西。半山 至人無心亦無法，古者養民如養兒。子由

筆下江山轉葱蒨，雲中樓閣自陰晴。朱子 大隱本來無境界，勝遊都爲好山川。東坡 惜花意欲春常

在，落筆乃與天同功。劉屏山 天下蒼生待霖雨，此間風物屬詩人。復古 瓣香急試博山火，好句真傳

雪竇風。誠齋 詩名官職稱雙好，丹桂靈椿並一時。誠齋 絕須絲竹娛安石，能使江山似永嘉。陳慥

經行東坡眠食地。會訪拾遺花柳村。山益谷

偶陪上閣鸞鸞會。新管江南山水來。梅聖俞 好作新詩

寄桑苧。想當逸氣吞江湖。

米元章 王廷珪

仲甫又見舊人集句兩聯甚佳。可作座右銘。一云。善言莫離口。善樂

莫離手。獨立不愧影。獨寢不愧衾。出句爲唐孟誥語。下句爲劉勰語也。一云。靜以修身。儉以養性。入則篤行。出則友賢。出句爲南史陸慧曉語。下句則家語也。

陳郭集句

張仲甫爲余述陳曼生郭頻伽合作集句楹聯。贈杭州高惺泉。日澹曰。爲文須略識字。終身不復鼓琴。上句昌黎文。下句史記語也。余不識高惺泉。味此集句。似尙有言外意。擬俟晤仲甫時詳詢之。

集曹全碑字

仁和高棗仲大使頌禾。有集曹全碑字爲楹帖者。甚工雅。五言。如和風君子德。時雨聖人懷。又仁孝本諸性。禮義根於心。又月下三升酒。風前萬里山。又幽懷在泉石。好景足風雲。又二分明月戶。萬里白雲鄉。又泉流雲際月。風動雨中山。又涼意水雲際。高懷山谷閒。又不止泉明酒。閒臨米老山。又雲白風清際。廉泉讓水閒。七言。如清風明月有其樂。嘉辰美景置諸懷。又殘陽遠水南朝寺。月白風清北郭山。又讓水廉泉高士屋。禮門仁里聖人居。又雲階月地幽人室。水遠高山隱士居。八言云。與禮同節。與樂同和。以義爲根。以仁爲本。又敦仁秉德。並受其福。修禮陳義。乃獲有年。又列紀陳綱。是王者政。安仁布義。與聖人居。又子

孝孫賢。至樂無極。時和歲有。百穀乃登。又仁孝齊家。廉明報國。和平處世。禮義立身。又勳蓋南陽。文綜西蜀。辭雄子建。經擬相如。又典重商周。鼎追秦漢。賢齊廣受。屋並機雲。

舊人集句

張仲甫嘗雜錄舊人集句見示。中有可書楹帖者。如好學爲福。惟道集虛。出莊子。在家常起早。偶地卽安居。山舟先生所集。無事此靜坐。有情且賦詩。同前。花竹有和氣。風泉無俗情。黃山谷。孟東野句。欲共幽人洗筆墨。但驚妙語雜風煙。東坡。放翁句。餘子風流追魏晉。太平胸次到唐虞。杜範。劉過句。彩毫閒試金壺墨。花□重尋貝葉書。李維。劉升贛句。青竹閒垂任子釣。牙籤喜校鄴侯書。劉過。張耒句。墨妙已窺王令帖。良材還斲蔡翁琴。趙孟頫。楊公遠句。風騷意度卑唐體。人物依稀似晉時。劉克莊。薛嵎句。交情淡似秋江水。贈句清於夜月波。郭祥正。楊誠齋句。詩酒淋漓出狂怪。虹霓吐暖忘寒饑。又千首放懷風月裏。一尊時對畫圖開。又囊簡久藏蝌蚪字。詩壇欲效鶴鵝軍。皆東坡句。政用疏通合典則。地分清切任才賢。少陵句。都將筆下文章潤。散作人間雨露濃。歐陽元句。胸蟠杜甫千閒腹。氣壓陳登百尺樓。曹伯隆句。拔薤已觀賢守政。壽親還慰魯侯心。東坡。安石句。已發政聲□召杜。不惟詩句似陰何。沈與求。王半山句。南斗日躔韓吏部。西湖風氣白香山。張耒句。常棣並爲天下士。先生真是地行仙。東坡句。

孫淵如先生童語

孫淵如先生之父爲某邑廣文。有老友某過訪之。留飲齋中。時先生甫九歲。往來行酒。走風雨中不輟。其友笑曰。稚子無知。走風雨。先生應聲曰。先生有道。出羲皇。某友大嘆賞。卽書作聯句。懸學齋中。此陳曼生郡丞所述。

賀牛姓喜聯

天津牛稔文太守。爲子娶婦。吾師紀文達公於太守爲中表兄弟。送喜對一聯云。繡閣團圓同望月。香閨靜好對彈琴。初不覺也。次日文達公來賀。乃謂太守曰。我昨所製聯。乃用君家典故。何如。

隱士門聯

有隱士署一聯於門云。風不出。雨不出。歌於斯。哭於斯。想見高雅之致。按堅□集云。孔侍郎極朝回。遇雨避於一叟廡下。叟延入廳事。逢迎甚恭。孔借油衣。叟曰。某寒不出。暑不出。風不出。雨不出。不知所謂油衣也。孔不覺宦輿頓消。此上聯所從出乎。

祈雨壇聯

明末辛巳壬午閒。蘇州亢旱。祈禱無驗。有滑稽子爲聯語。懸之齋壇云。妖道惡僧。三令牌。擊退風雲雷雨。貪官污吏。九叩首。拜出日月星辰。一時傳以爲笑。

某明府題武廟聯

張丹村廣文作楠梅篔隨筆云。錢貢麗水縣迎賓館記云。賓入門而左。額曰見賓。取出見大賓之義也。將入館。顏某堂曰。澹臺公至。取非公事不見邑宰之義也。讀之不覺噴飯。又謁武廟。見某明府題聯云。兄元德。弟翼德。水擒龐德。生蒲州。會涿州。坐鎮荊州。同官多哂之。余謂近集人撰周易緯史。於屯六二。稱曹操待壽亭侯。需上六。稱劉備桃園結義。如明府輩。更不必與之證陳壽之史。裴松之注矣。

彭甘亭長聯

客有以彭甘亭尺牘求題識者。册後有一長聯。出句云。那畔消息。見半點兒。有甚把鼻。若非千了萬了。說不盡百樣郎當。因此上。雪山中。忙到釋迦。喫麻喫麥。受苦擔饑。生怕放逸魔。花費眼前日子。對句云。這邊事情。到十分處。還未稱心。霎時間。七句八句。却原來一場扯淡。只落得漆園裏。笑煞莊周。應牛應馬。逍遙散慮。都將順逆境。交付頭上天心。按此多彼法。奧妙語。甘亭沈酣內典。必能別有會心。附錄之以待懸解。

某相國堂聯

舊有某相國堂聯云。放開肚皮喫飯。立定脚跟做人。或議其上句不雅。徐野客曰。彼長戚戚之小人。震雷常在匕箸間。那能放開肚皮喫飯乎。

陳見三聯

陳見三蘇州人。賣藥邗上。以此起家。開有青芝堂藥鋪。爲揚州第一家。買鄧侍郎休園爲別業。捐同知銜。每遇喜慶宴會。輒著天青褂。五品補服。居然以搢紳自命。有輕薄子製一聯贈之云。五品天青褂。六味地黃丸。按休園今已易主。余曾飲讌其中。

江山船聯

浙水江山船。最爲著名。船之後艙。皆有漁婦。率以豔粧對客。客必稱之爲同年嫂。相傳爲前明陳友諒之族戚。爲明祖貶落於此。凡九姓。限其自爲婚姻。不得通至他鄉。故至今未能振拔。而傳粉施朱。淺斟低唱。舟中客。鮮不被其蠱惑者。往往南北倒行。以拖延其時日。舟中客。每晝夜酣歌而不知也。此九姓者。皆桐廬嚴州人。故相呼爲桐嚴嫂。外人乃訛桐嚴爲同年耳。船製頗精美。兩岸風景亦絕佳。吾閩人由建溪徧仄而來。到此忽心開目朗。坐臥甚便。且客中忽入靡曼之鄉。驟得偃倚之樂。故尤心醉焉。有客題船窗一聯云。游目騁懷。此地有崇山峻嶺。茂林修竹。賞心樂事。則爲你如花美眷。似水流年。以蘭亭序對玉茗詞。頗有風趣。此聯相傳已久。至今往來吳越江鄉者。能道之。又有才士題江山船聯云。泛宅便爲家。有紅粉青蛾。長新風月。他鄉忘作客。看千巖萬壑。如此江山。亦工切。

周冰持自署門聯

松江詩話云。華亭周垂綸。鷹宿來太守子也。有子名稚廉。字冰持。負才不偶。迹類清狂。嘗署門一聯云。論家世。如閣帖古窰。可謂舊矣。問文章。似談箋顧繡。換得錢無。

酒肆聯

錢梅溪曰。途中遇沽酒者。或賣花者。其香撲鼻可愛。擬將探入詩中而未得也。偶見市中酒肆挂一聯帖云。沽酒客來風亦醉。賣花人去路還香。不知何人所作。可謂先得我心者矣。又曰。酒肆聯有絕可笑者。如劉伶借問誰家好。李白還言此處佳。每處皆有。不知起於何時。又河南永城睢州一帶酒店聯云。入座三杯醉者也。出門一拱歪之乎。則更堪噴飯矣。按吾閩亦有酒肆通行聯云。鐵漢三杯軟脚。金剛一盞搖頭。蓋自誇其酒之佳。又別一意也。梅溪又曰。南陽夏鎮各處人家。門外俱有一聯云。五湖天馬將。四海地龍軍。則竟不知作何語。

女校書朱玉聯

秦淮女校書朱玉。敏慧能識人。嘉慶庚午。趙甌北先生。重赴鹿鳴宴。常主其家。朱玉乞先生贈楹聯。時玉有徵蘭之信。先生手揮一聯應之云。憐卿新種宜男草。愧我重看及第花。一時傳爲佳話。

王扶九聯

宋小茗耐冷談云。同里王扶九。年老。就幕粵西。爲某縣延徵比一席。除夕戲書楹帖云。白髮蕭然。看他人

兒女夫妻。千般恩愛。黃金盡矣。數此日油鹽醬醋。百計安排。詰朝主人入館賀歲。見之惻然。贈以千金。並舟車之費。送其歸里。壽終於其家。

陳小雲自題聯

陳小雲。裴之寓居漢陽。於小樓上自題一聯云。情殷報國。臣之壯也。不如人仗藥鑪經卷。了却三生。更休提如花美眷。志在養親。富可求乎。聊復爾。幸楚尾吳頭。剛通一水。定能容若葉浮萍。詞旨淒宛。未幾。卽客死鄂城。了却三生。真成語識矣。